

BUKU DIA

ETSHA WA ATUMAMI

Diui Dia Ntundu

1 Teofilo li, buku dia ntundu diakamafundi diku, ne dia akambu tshe wakatatela Jesu ntsha ndu mbetsha, 2 edja ndu lushi lakandosama l'ulungu, l'okongo a lam'akandashili mbidjanga atumami wakandasonola uma le Nyuma k'Ekila. 3 Le waku wakandayaenya la lumu l'okongo w'asui andi uma lu ahimbelu efula. Ndi akenama le wo yediko ya nshi akumi anei. Ndi akataka akambu wa diulelu dia Unyashungu. 4 Lam'akandasangana kame la wo, ndi akâkokomiya ati: Tanyumoki uma la Jerusalem, keli nyukungi daka dia Papa, diakanyuki uma le mi. 5 Ne dia Joani akabatizaka l'ashi, keli nyu nyayubatizama la Nyuma k'Ekila, aha nshi efula umaka kakiane.

Jesu Utambela Utsha l'Ulungu

6 Okone lam'akawasangana kame, vo wakawumbula vati: Khumadiondjo, undi, we ayulwela Isariyele diulelu lu etena kakona? 7 Ndi akâkaluya diui ati: Aha dikambu dianyu dia mbeya tena kana enonyi wakashikike Papa lu wulu andi. 8 Keli nyu nyayulungula wulu lam'ayuya Nyuma k'Ekila le nyu. Nyu nyayuyala emenyi ami lu Jerusalem, lu Judiya tshe la Samariya edja ndu l'ekumelu ka kete. 9 Lam'akandashili mvuta aui aso, lam'akawawendaka, ndi akosama utsha l'ulungu. Dingi diakûlungula uma lu ashu awo. 10 L'etena kakawendaka utsha l'ulungu tee, lam'akandatshokaka, nyulungi, apami ahendi wolotshi ahondo wa wema, wakemala lasuki la wo. 11 Vo wakati vati: Nyu asi Ngilili, dikambu kuna diemalanyu, ku mendaka l'ulungu? Jesu one, lambosama l'ulungu uma le nyu, ayuya wuhu ako, uku awenanyu atatshu utsha l'ulungu.

Lu Luudu la Ladiku

12 Ku vo wakakalula utsha la Jerusalem uma l'ukungu, wetawo vati: Ukungu w'Eweli, weli lasuki la Jerusalem, uku lokendo la lushi otoi l'ekila. 13 Ku lam'akawakalula leko, vo wakambela lu

Luudu la ladiku, lene akawadjaseka, Petero, Joani, Jakoba, Andere, Filipino, Tomasi, Baratolomayo, Mateu, Jakoba, on'a Alafayo, Simona Kanga-Saki, Judasi, on'a Jakoba. 14 Vo tshe wakakolamela nomba l'utema otoi, kame la amantu, ndu la Mariya nyangu Jesu la anangu.

Ekumelu ka Judasi; Wambosonola Matiyasi

15 Lu nshi sho, Petero akemala l'atei a anyandi (waki ului w'antu kame uku lukama la akumi ahendi), akati ati: 16 Analingu, diaki la afundelu nshidiyama kakati Nyuma k'Ekila ntundu l'unyo wa Davidi, ne dia Judasi laki olombodi a waku wakandi Jesu, 17 ne dia ndi akalema la su. Ndi akalungula etenyi kandi l'ulimu one. 18 (Untu one akakundja ekambo la difutu dia kolo kandi. Ndi akako ekhukhumadi, akate k'atei; esohi andi tshe wakatumbi. 19 Dikambu so diakeyama le asi Jerusalem tshe. Okone vo waketi ekambo kako l'oteketa awo vati: Akeledama, nkadimula ati: Ekambo ka Dikila.) 20 Ne dia ambufundama lu buku di'Esambu ati: Edjaselu kandi kayali hwe; Untu tadjaseki loko, La ukina akiti ulimu andi. 21 Okone uma l'atei w'apami wakakendakendaka la su tena tshe diakotoka ndu diakatumbaka Khumadiondjo Jesu l'atei asu, 22 umaka batiza ka Joani edja ndu lushi lakandosama utsha l'ulungu, dieli la omotshi ndjala omenyi kame la su lu eulwelu kandi. 23 Vo wakeme ahendi, Josefu, letawo vati: Barasaba, letawo ntu vati: Justo, la Matiyasi. 24 Ku vo wakalombe, wakati vati: We Khumadiondjo, leya etema w'antu tshe, l'atei w'antu ane ahendi, utenya one lakayasonodi, 25 dia ndi nkita dihuli la ulimu one ndu utumami diakatshiki Judasi, ne dia ndi ntsho lu dihuli diandi. 26 Vo wakawaukela uwali. Uwali akandi Matiyasi. Ku ndi akalema kame la atumami dikumi la otoi.

Lushi la Pentekosta

2 Lam'akayala lushi la Pentekosta, vo tshe waki kame lu dihuli otoi. 2 Luhelu lakayi

shashimuya uma l'ulungu uku atopepaka lopepe la wulu, ku lakaluli lu luudu tshe lene akawadjashi. 3 Nimi yakenama le wo, yakate uku nimi ya dja, ku yakahema ladiku diawo vo tshe untu l'untu. 4 Vo tshe wakaluli la Nyuma k'Ekila, wakatatela nteketa eteketa ekina uku akâketeksha Nyuma.

5 La Jerusalem kakaladi asi Juda, antu w'ololo, w'uma lu wedja tshe wa l'esi ulungu. 6 Lam'akawuki luhelu lako, ului w'antu wakamote kame, wakambi ne dia untu l'untu akawauki wateketa oteketa andi. 7 Vo tshe wakakashimo, wakambi wata vati: Wane tshe wateketa, waha asi Ngallili uka? 8 Ku ukundi wukasu untu l'untu ateketa oteketa asu wa luto? 9 Asi Paratiya, asi Mediya, asi Elame, la wane wudjashi lu Mesopotamiya, lu Judiya la Kapadokiya, lu Poto la Asiya, 10 lu Furungiya la Pamufuliya, lu Edjibitu la beke dia Libiya dieli lasuki la Kurene, ndu angendangenda w'uma lu Romo, ndu asi Juda la ambetawudi awo, 11 ndu asi Kerete, la asi Arabiya, shu mbaukaka wata etsha a wulu wa Unyashungu lu eteketa asu. 12 Ku vo tshe wakuki woma, wakakanana; wakambwana vati: Na wuhu wa dikambu ne? 13 Keli akina wakole, wakati vati: Vo wambudjo wanu w'uyuyu.

Daku Dia Petero

14 Keli Petero akemala ndi la atumami dikumi la otoi, akedia diui diandi; akawatela ati: Nyu asi Juda, ndu nyu wane wudjashi lu Jerusalem, nyeyi dikambu ne, nyuhuke atui lu aui ami! 15 Ne dia antu ane hawudjwi wanu uku akananyu, ne dia unya eki paka eshidi divwa etu. 16 Keli one eko dikambu diakati umvutshi Joele ati: 17 Unyashungu kata ati: Lu nshi y'ekumelu, Dimi layutshulwela antu Nyuma kami, An'anyu w'apami la an'anyu w'amantu wayuta akambu wahatayi. Elongo anyu w'apami wayena waenelo, Esumbi anyu wayena alo. 18 Ee, lu nshi yako dimi layutshulwela Ekambi ami w'apami la w'amantu Nyuma kami. Ku vo wayuta akambu wahatayi. 19 Dimi layenya akambu wa mamba ladiku dia ulungu, La tulimbitelu l'esi ka kete; Dikila la dja, ndu lungi la edinga. 20 Unya ayukadimo udjima, Ngondo ayukadimo dikila, La ntundu ka lushi la Khumadiondjo latayi, Lushi lako la wuki ndu la mamba. 21 Ku lam'ayuyala dikambu so, untu tshe layeta lukumbu la Khumadiondjo, ayushimbamela.

22 Nyu asi Isariyele, nyuki aui ane: Jesu y'usi Nazareta, untu lakanyulimbitshiya

Unyashungu uma lu etsha a wulu la akambu wa mamba, ndu tulimbitelu takatshi Unyashungu uma le ndi l'atei anyu uku wenanyu, 23 akakimwama uma l'esangweyu kakasanguyama la yimba yakakani Unyashungu ntundu. Nyu nyakûhane lu utamba a mpeketanya, nyakûdiaki lu anyu w'antu wa kolo. 24 Keli Unyashungu akawulula, akûkelekula uma lu shoko ya nyoi, ne dia nyoi kumbeya mbûkimela pundju. 25 Ne dia Davidi akati lu dikambu diandi ati: Dimi lakenaka Khumadiondjo nshi tshe la ntundu kami, Ne dia ndi eko lu lunya lami la pami. Dimi ntukusutshasutshama. 26 Okone utema ami aki la ongenongeno, La lulimi lami lakangenangena. Dikambu dikina, dimba diami diayutshikala la elungamelu; 27 Ne dia we hutshika lumu lami l'Udimu a Pengandu, We hakimo laye l'Ekila dia ndi mponda. 28 We akamenya mbuka ka lumu; We ayundudia la ongenongeno uma l'elundji kaye.

29 Analingu, dimi mbeyaka nyuhunwela dikambu dia tshesu Davidi nti: Ndi akavu, akakhundama; diumbu diandi dieko l'atei asu edja ndu elo. 30 Ndi aki umvutshi; akeyi ati: Unyashungu akûtshibela ati: Dimi layudjasha kanula motshi y'uma l'utema aye lu kiti kaye ka diulelu. 31 Ndi akenyi dikambu ne ntundu, akati dia eulwelu ka Kristu, ndi kuntshikama l'Udimu a Pengandu, dimba diandi komponda. 32 Unyashungu akulula Jesu ako. Shu tshe teko emenyi wa dikambu diako. 33 Okone ndi akambiama la lunya la pami la Unyashungu, ndu akalungula daka dia Nyuma k'Ekila uma le Shi; ndi akaditshulula uku wenanyu lu wukanyu. 34 Ne dia Davidi kumumbela l'ulungu, keli ndi ndame akati ati: Khumadiondjo akatela Khumemi ati: Udjase lu lunya lami la pami, 35 Edja ndu lambete atunyi aye kihuna k'ekulu aye. 36 Okone khumbu tshe ka Isariyele weyi mete vati: Unyashungu aketi Jesu ako, lakanyadiaki lu utamba a mpeketanya ati: Khumadiondjo la Kristu.

Eyelelu ka Daku Dia Petero

37 Lam'akawuki diui so, vo wakanyangi wulu l'etema awo, ku wakambula Petero la atumami akina vati: Anengesu, kayututsha na? 38 Petero akawatela ati: Nyukadimuli etema, nyubatizami nyu tshe untu l'untu lu lukumbu la Jesu Kristu, ne dia edimanyelu ka kolo yanyu, ku nyu nyayulungula uhasha wa Nyuma k'Ekila. 39 Ne dia daka dieko le nyu, le an'anyu, ndu wa l'etali tshe, wayeta

ETSHA WA ATUMAMI

Khumadiondjo Unyashungu asu le ndi. 40 Ndi akawatela aui akina efula, akâlaki ati: Nyuyashimbela uma lu lolonga la kolo lone! 41 Ku wane waketawo diui diandi, wakabatizama. Lushi lako, antu uku nunu satu wakasanganyema kame la wo. 42 Vo wakakolamelala lu wetshele wa atumami, ndu lu ekesanelu kawo, ndu lu diatwelu dia ma, ndu lu dombelo.

Embetawudi Wambutsha Uku Antu w'Etoi Utema

43 Woma akawandi vo tshe. Atumami wakatshi akambu wa mamba efula ndu tulimbitelu. 44 Wane tshe waketawo, waki kame, ndu wakasanganya diango tshe kame. 45 Vo wakasundja dikambo diawo, ndu diango diawo, wakadikahanya le antu tshe uku akahumbi untu l'untu. 46 Vo wakakolamelala mbukana lushi la lushi lu etemwelo, wakatolaka ma lu mvudu yawo. Vo wakalekaka ma diawo la ongenogeno ndu l'etema wa lukahu. 47 Vo wakandula Unyashungu, wakalemiama le antu tshe. Ku la lushi la lushi, Khumadiondjo akasanganyaka wane wakashimbamelaka kame la wo.

Kanga Ekhusi Ambokono la Suku Dia Dimena

3 Petero la Joani wakatatshokaka utsha l'etemwelo l'ushidi wa dombelo, aki l'eshidi esatu. 2 Untu lakuto ekhusi aki leko. Antu wakawembaka, wakûkitshaka la lushi la lushi lu suku dia etemwelo, diakawetaka vati: Dimena, dia ndi nombaka wane watotoka l'etemwelo diango. 3 Lam'akandenyi Petero la Joani wayanga mboto l'etemwelo, ndi akâlombe engo. 4 Petero akawendi tee, ndu Joani, wakati vati: Utendi. 5 Ndi akawaukela, alungamela ati: Dimi layulungula engo. 6 Keli Petero akati ati: Dimi kema la fesa kuyanga paunyi, keli layukusha keli la mi. Lu lukumbu la Jesu Kristu y'usi Nazareta, okendekende. 7 Ku ndi akûkimela lu lunya la pami, akawunyia. Kem'edja, akaka andi la tokolongonyo tandi wakakikitala. 8 Ndi akunela esadi, akemala, akatatela nkendakenda. Ndi akoto la wo lu etemwelo atakendakenda, atalimbolimbo, atandula Unyashungu. 9 Antu tshe wakawenyi akendakenda, andula Unyashungu, 10 wakaweyi vati: Nd'one lakadjaseka alomba diango la Suku dia Dimena dia etemwelo. Vo wakatamanya mamba dia

akambu wakawûtshele.

Daku Dia Petero

11 Lam'akamamema kanga ekhusi Petero la Joani, antu tshe wakâkungutanela lu mbalasa, ketawo vati: Ka Solomona, wakambi efula. 12 Lam'akenyi Petero dikambu so, ndi akambula antu ati: Nyu asi Isariyele, okoko wana wambanyu dia dikambu ne? Okoko wana watendanyu tee okone, uku shu mbökendjikendjisha la wulu asu, kuyanga la ololo asu? 13 Unyashungu wa Abarahama, wa Isaka, wa Jakoba, Unyashungu a watshesu, ambutumbula ukambi andi Jesu; lakanyakimo, lakanyanguna lu ashu wa Pilata, lam'akandasanguya mbutshungula. 14 Keli nyu nyakatuni One l'Ekila la Ololo, nyakalombe undjakanyi dia vo nyushandi. 15 Nyu nyakadiaki Uwandji a lumu. Unyashungu akawulula uma lu nyoi. Shu teko emenyi wa dikambu diako. 16 Uma lu mbetawo lukumbu landi, lukumbu landi lambukikitsha untu one lendanyu ndu leyanyu. Mete, mbetawo k'uma le ndi kambuwusha wulu one tshe lu ashu anyu, nyu tshe.

17 Anyasu, kakiane dimi mbeyaka nti: Nyu nyakatshi dikambu so ne dia nyu kudieya, uku akatshi ndu embuledi anyu. 18 Okone Unyashungu akashidiya akambu wakandati l'enyô w'amvutshi tshe ati: Kristu kami ayusuwa. 19 Okone nyukadimuli etema, nyusikiso dia kolo yanyu nyimanyama, dia deku dia nyodia ndja uma la ntundu ka Khumadiondjo. 20 Ndi ayunyutumela Kristu lakandanyosonwela, Jesu ndame. 21 Dieli la ndi dia ntshikala l'ulungu, edja ndu etena ka ekalwelu k'akambu tshe wakati Unyashungu l'enyô w'amvutshi andi w'ekila waki umaka etatelu. 22 Mete kakati Mose ati: Khumadiondjo Unyashungu anyu ayunyia umvutshi uma l'atei w'anyanyu uku dimi. Kanyuwukeli lu akambu tshe wayundunyutela. 23 Dikambu so diayuyala, dia untu tshe lahetawo umvutshi ako ndjakema l'atei w'antu. 24 Mete, amvutshi tshe wakateketaka, uma le Samuele la wane waki l'okongo andi, wakati dia nshi nye. 25 Tukanula t'amvutshi mbenyu, la ta sheki yakadjela Unyashungu watshenyu, lam'akandatela Abarahama ati: Wedja tshe wa la kete wayotshokwama uma le tukanula taye. 26 Unyashungu akulula ukambi andi, akanyutumelandi ntundu dia

nyotshokola lam'ayundunyunya uma lu kolo yanyu.

Wambunda Petero la Joani

4 Lam'akawatelaka antu diui so, elombedi a waki la olombodi w'etemwelo la Asaduke wakayi le wo. 2 Vo waki la kele ne dia vo waketshaka antu, wakatelaka antu dikambu dia eulwelu k'uma lu nyoi, ne dia Jesu akulo. 3 Vo wakawandi, wakawadji lu lukanu edja ndu la wedi a pindju, ne dia aki dikolo. 4 Keli antu efula wakuki diui, waketawo. Apami waki uku nunu tanu.

Wambutsho la Petero la Joani la Ntundu k'Embadi

5 La wedi a pindju, embuledi la dikumanyi la afundji wakasangana la Jerusalema. 6 Anasi, olombedi a ladiku, aki laawo, ndu Kayifasi, ndu Joani, ndu Alesandere, ndu wa lu khumbu k'olombedi a ladiku. 7 Lam'akawawaeme l'atei awo, vo wakawambula vati: Uma lu wulu akona, kana lu lukumbu lakona lakanyatshi dikambu ne? 8 Ku Petero, lakaluli la Nyuma k'Ekila, akawatela ati: Nyu embuledi wa wudja la dikumanyi, 9 elo shu tambumbwana dia dikambu di'ololo diutshamedi kanga dimba wodu, dia okone wakakono untu one. 10 Nyu tshe nyeyi, ndu asi Isariyele tshe, nyati: Lu lukumbu la Jesu Kristu y'usi Nazareta, lakanyadiaki lu utamba a mpeketanya, lakulula Unyashungu uma lu nyoi, ne dia lukumbu lone mbemadi untu one la ntundu kanyu. 11 Ndi keli dive diakanyatuni, nyu ambiki a luudu, diakayala ote a tshuku. 12 Panda kema le untu ukina. Nduku lukumbu lukina la tshina di'ulungu lamboyama le antu, leya ntushimbela.

Wambuhimba Nshimba Petero la Joani

13 Lam'akawenyi dihunga dia Petero la Joani, lam'akaweyi vati: Haweyi mukanda, antu k'antu mbewo, vo wakambi, wakawaeyi vati: Waki la Jesu. 14 Lam'akawenyi untu lakakono emadi la wo, vo kumbeya mvuta nduku diui. 15 Keli lam'akawawatela vati: Nyumo uma l'elumbwelu, wakambwana 16 vati: Ukundi atshelasu antu ane? Mete, tshe watuyalaka la Jerusalema, wambena vati: Dikambu dia mamba dieyama, mbakatshi antu ane. Shu hateyi dianguna. 17 Keli dia dikambu ne tadiudianganaki l'atei w'antu, tuwaneli shati: Tanyutelaki untu dikambu lu lukumbu lone pundju. 18 Vo wakawaeti, wakâkokomiya diaha vo mvuta nduku diui, kuyanga mbetsha antu lu lukumbu la Jesu.

19 Keli Petero la Joani wakâkaluya diui vati: Naka eko ololo lu ashu a Unyashungu dia nyukela uleki mbukela Unyashungu, nyusambuli nyame. 20 Ne dia shu hateyi ntsha dikambu dikina, paka mvuta akawawakatenyi la wakatuki. 21 Lam'akawawanela ntu, vo wakâkimo, komena lama mbasuya, ne dia antu. Ne dia antu tshe wakatumbulaka Unyashungu dia dikambu diakatshama. 22 Ne dia untu lakawatshela dikambu so dia mamba dia nkono, aki la deku akumi anei.

Ambeki Wambusangana Dia Mandula la Nomba Unyashungu

23 Lam'akawâkimo, vo wakakalula le anyawo, wakasanya akambu tshe wakawatela elombedi a waki la dikumanyi. 24 Lam'akawuki dikambu so, vo wakedia aui awo kame le Unyashungu, wata vati: Khumadiondjo, we kakatungi ulungu la kete, la ashi a waki, la diango tshe dieli loko. 25 We kakati uma le Nyuma k'Ekila l'unyo wa tshesu Davidi, ukambi aye, wati: Okoko wana wakafunela asi wedja kete? Okoko wana wakakani antu akambu w'anyanya? 26 Khumi ya dikanga ya la kete wakashikikala, Embuledi wakasangana, Dia mbidjela Khumadiondjo sheki, ndu le Ukitali andi w'iso. 27 Mete, l'usumba one, Herode la Potiyo Pilata, la asi wedja, la asi Isariyele wakasangana dia mbidjela ukambi aye w'ekila Jesu, lakayakiti iso, sheki, 28 la dia ntsha akambu wakashonola lunya laye la utema aye ntundu wati: Wayuya. 29 Khumadiondjo, kakiane, ulungi aui awo wa dianelu. Usha ekambi aye dia vo mvuta diui la dihunga tshe, 30 lam'asimbulaye lunya laye dia nkonoya antu, tulimbitelu la akambu wa mamba watshami lu lukumbu la ukambi aye w'ekila Jesu. 31 Lam'akawalombe, dihuli diakawasangana diakasutshasutshama. Vo tshe wakaludiana la Nyuma k'Ekila, wakati diui dia Unyashungu la dihunga.

Embetawudi Wambusanganya Diango Kame; Ushasha wa Baranaba

32 Embetawudi waki la utema otoi. Nduku untu lakati ati: Diango dieli la mi, diami mbedio. Keli vo wakasanganya diango diawo tshe kame. 33 Atumami waki la wulu efula wa mvutela antu dia eulwelu ka Khumadiondjo Jesu. Ngandji ka mamba kaki le wo tshe. 34 Nduku untu l'atei awo akahumbi engo. Ne dia wane waki la kambo kana mvudu, wakasundja, wakela diango diakawalungula. 35 Vo wakadikitsha la ntundu ka atumami. Vo

ETSHA WA ATUMAMI

wakadikaha le untu l'untu, uku aki ehumba awo. 36 Untu omotshi, lukumbu landi Josefu, lakole atumami ntu vati: Baranaba (kitshimudi ati: Ona l'ekikitshelu), usi Lewi kankindi, akuto la Kupiro. 37 Ndi aki la ekambo, akakisundja, akela falanga, akayikitsha la ntundu k'atumami.

Ananiya la Safira

5 Keli pami kemetshi, lukumbu landi Ananiya la wadendi Safira wakasundja etshi ka kete. 2 Ndi akashe etenyi k'ushinga, ndu wadendi akemot dikambu diako. Ndi akela etenyi kemetshi, akakikitsha la ntundu k'atumami. 3 Keli Petero akawutela ati: Ananiya, ukundi ambulula uhimbanyi l'utema aye, dia we nkesa Nyuma k'Ekila, la dia we mbishe etenyi k'ushinga w'ekambo? 4 Lam'aki ekambo l'anya aye, to taki ekambo kaye uka ? Lam'akayakisundja, ushinga ato tawaki ushinga aye? Ukundi akayakani yimba dia dikambu ne l'utema aye na? We hakeshi antu, Unyashungu kukeshiye. 5 Lam'akuki Ananiya aui aso, ndi akako, akavu. Woma wa mamba akandi antu tshe wakuki diui diako. 6 Elongo w'apami wakunela, wakawombe la ahondo, wakatumbi la ndi, wakatũkhunde.

7 Lam'aketi unya uku tenyi satu, wadendi akoto. Ndi kumbeya dikambu diakatshama. 8 Petero akawutela ati: Umvuteli kana nyu nyakasundjisha ekambo l'ushinga one. Ndi akati ati: Elu, l'ushinga uku. 9 Keli Petero akawumbula ati: Ukundi akanyasangi lulimi dia mpimba Nyuma ka Khumadiondjo? Enda, wanya a waku wakakhunde umeye weko la suku, vo wayutumba la ye. 10 Kem'edja, ndi akako la ntundu kandi, akavu. Elongo w'apami wakoto, wakũtani ambuvo, wakatumbi la ndi, wakatũkhunde la le umendi. 11 Ekelezia tshe wakuki woma efula, ndu wane tshe wakuki akambu aso.

Embetawudi Wambuyala Efula

12 Atumami wakatshi tulimbitelu efula la akambu wa mamba l'atei w'antu. Vo wakasangana l'utema otoi lu mbalasa ka Solomona. 13 Antu akina kundjala la dihunga dia mboto l'ului awo. Keli antu wakalemia. 14 Embetawudi, elui w'apami la w'amantu, wakatafulanelaka le Khumadiondjo. 15 Dia dikambu so, vo wakela akanga a hemo l'esese, wakakitsha lu tangi la poi, vati: Lam'ayeta Petero, didjidji diandi diayukumba omotshi. 16 Antu efula w'uma lu esumba waki lasuki la Jerusalema wakasangana, wakela akanga a hemo, ndu wane wakahenyahenyama la

edienge. Vo tshe wakakono.

Wambudja Atumami lu Lukanu Ntu; Wambutumba Wambusambisha Antu Ntu

17 Keli olombedi a ladiku akunela, ndu waki la ndi tshe waki lu leke la Asaduke, wakaluli la kandjema. 18 Vo wakandi atumami, wakawadji lu lukanu. 19 Keli ondjelo wa Khumadiondjo akadihula kuki ya luudu la lukanu l'utshu, akátundja; akawatela ati: 20 Nyutshu, nyutemali l'etemwelo, nyututeli antu aui tshe wa Lumu lone. 21 Lam'akawuki diui so, vo wakoto lu etemwelo la lokese, waketsa antu.

Keli olombedi a ladiku, la wane waki la ndi, wakasanganya embadi, ndu ului tshe wa dikumanyi di'asi Isariyele, akatumi diui lu luudu la lukanu dia ndja la wo. 22 Keli lam'akayi asi mbalasa vo kumbatana lu luudu. Vo wakakalula, wakati vati: 23 Takatanyi luudu la lukanu ludihami ololo, la alami wemadi lu asuku. Keli lam'akatadihudi, shu hatutanyi nduku unti loko. 24 Lam'akuki olombodi w'etemwelo la elombedi a waki aui aso, vo wakakanana efula dikambu diawo, vati: Ukundi ayuyala dikambu so na? 25 Untu omotshi akayi akayuwatela ati: Enda, antu wakanyadji lu lukanu ane wemadi l'etemwelo, wetsha antu. 26 Ku olombodi la asi mbalasa wakawaela aha la khudu, ne dia vo wakuki antu woma vati: Watukutuka ave.

27 Lam'akawawaela, vo wakawaeme la ntundu k'embadi. Ku olombedi a ladiku akawatela ati: 28 Shu takanyokokomiya shati: Tanyetshaki antu lu lukumbu lone. Enda, nyu nyambukutsha Jerusalema la wetshelu anyu, nyu nyangaka ntukitshiya dikila dia unti one l'ete asu. 29 Keli Petero la atumami wakakaluya diui vati: Dieli la su dia nkitanyia aui wa Unyashungu, aha aui w'antu atu. 30 Unyashungu a watshesu akulula Jesu lakanyahane l'utamba, lakanyadiaki. 31 Unyashungu akawedia la lunya landi la pami, dia ndi ndjala Olombodi la Ushimbedi, dia mbisha asi Isariyele ekadimwelo k'etema la edimanyelu ka kolo. 32 Shu teko emenyi wa akambu aso. Ndu Nyuma k'Ekila, kakasha Unyashungu waku watũkitanyia, eko omenyi.

Ngamaliyele Ambulaka Antu

33 Keli lam'akawuki diui so, vo wakuki keke ka wulu, wakalangi mbãdiaka. 34 Keli Ufarise omotshi, lukumbu landi Ngamaliyele, akemala l'atei w'embadi. Ndi aki umbetsha w'elembe, akalemiamu la antu tshe; akati ati: Watukutumba yema.

35 Ku ndi akawatela ati: Nyu asi Isariyele, nyutukukana yimba dia ntshela antu ane dikambu. 36 Ne dia nshi ya ntundu, Tudasi akunela, akati ati: Dimi untu a wuki. Apami uku kama nyei wakūmamema, ku ndi akadiakema. Tshe wakūyelaka, wakahandjo. Dikambu diawo diakayala anyanya. 37 L'okongo andi, Judasi y'usi Ngalili akunela lu nshi ya nfunda kumbu y'antu, akakutula antu amotshi l'okongo andi, ndu ndi akavu. Waku tshe wakūkitanyia, wakahandjo. 38 Kakiane, dimi lambunyutela nti: Nyangani uma le antu ane, nyuwaete. Naka dikambu ne kana ulimu one weko uma le antu, ayuyala anyanya. 39 Keli naka dio dieli uma le Unyashungu, nyu hanyeyi mbalembia: nyutukuyala uku wane walosha Unyashungu ta.

40 Vo waketawo diui diandi. Lam'akaweti atumami, vo wakākomola; wakākokomiya vati: Tanyutaki diui lu lukumbu la Jesu, ku wakākimo. 41 Ku vo wakamo uma la ntundu k'embadi, watangenangena ne dia vo wakakuki dia monywama dia lukumbu loso. 42 La lushi la lushi lu etemwelo ndu la wakawo, vo kumpeko mbetsha antu la nsambisha Lukumu l'Ololo vati: Jesu keli Kristu.

Wambosonola Alami a Diango Esambeli

6 Lu nshi sho, lam'akafuli ambeki, asi Juda wa lu leke laki asi Ngirika wakangunangunela asi Heberu, ne dia vo wakakale wadi waki edu awo lu ekahelu ka diango ka la lushi la lushi. 2 Atumami dikumi la ahendi waketi ului w'ambeki, wakati vati: Hasungana dia shu nkimo diui dia Unyashungu la ntsha ulimu a mesa. 3 Anyasu, nyuyangi apami esambeli akanga a lukumu l'ololo uma l'atei anyu, wane wuludiami la Nyuma k'Ekila la yimba, tuwakitsha ladiku dia dikambu ne. 4 Keli shu tayutetemala l'ulimu wa diui la l'ulimu wa dombelo. 5 Diui diako diakāngenyanganya vo tshe. Vo wakasonola Stefano, lakaluli la mbetawo la Nyuma k'Ekila, la Filipino, la Porokoro, Nikanora, Timona, Paramena, la Nikolao ka l'Atioka, laketawo dikambu dia Judasi. 6 Vo wakawaeme la ntundu ka atumami, wakalombe Unyashungu, wakawahe anyu.

Elombedi Efula Wambuyala Ambeki

7 Diui dia Unyashungu diakafuli. Ambeki wakafuli la Jerusalema otekoya. Ndu elombedi efula waketawo.

Wambunda Stefano

8 Stefano, lakaluli la ngandji ka mamba la wulu, akatshaka akambu wa mamba a waki la tulimbitelu l'atei w'antu. 9 Keli amotshi uma l'etemwelo kakawetaka vati: K'Atshungwami, ndu asi Kurene, ndu asi Alesanderiya, ndu asi Kilikiya la Asiya, wakunela, wakadji la Stefano tamu. 10 Vo kumbeya mbuleka yimba; la Nyuma mbakandateketaka. 11 Ku vo waketawuya apami amotshi dia vo mvuta vati: Takawuki atenga Mose la Unyashungu. 12 Ku vo wakatombosha antu ndu dikumanyi ndu afundji, wakayi le ndi, wakawundi, wakatshu la ndi le embadi. 13 Vo wakeme emenyi wa kashi, wakati vati: Untu one haheko monyola dihuli di'ekila ne la elembe. 14 Ne dia takawuki ata ati: Jesu usi Nazareta ayulanya dihuli ne, ayukadimula ditshelu diaketsha Mose. 15 Waku tshe wakadjashi l'ului, wakawendi tee, wakenyi elundji kandi uku ka ondjelo.

Stefano Ambuyateketela

7 Olombedi a ladiku akawumbula ati: Akambu aso mete kewo? 2 Ku ndi akati ati: Analingu la wapapa, nyuhukami! Unyashungu a lutumbu akene le tshesu Abarahama, lam'akindi la Mesopotamiya, ntundu ndi atadjase la Harana. 3 Ndi akawutela ati: Umo uma lu kete yaye, uma l'atei w'asikaye, utshu lu kete yayumukanya. 4 Ku ndi akunela uma lu kete ya Kaladiya, akayudjase la Harana. Lam'akavu shi, Unyashungu akawunya uma leko, akayūkitsha lu kete yudjashinyu kakiane. 5 Ndi kumbusha ukito leko, kuyanga hyuli ya nkitsha dikaka diandi. Lam'akindi atuti ona, Unyashungu akūlaki ati: Dimi layukusha kete nye, we la tukanula taye. 6 Unyashungu akati ati: Tukanula taye tayuyala lu kete ya kana. Vo wayuwulunga fumbi, wayātshela kolo deku kama nyei. 7 Unyashungu akati ati: Dimi layulumbuya wudja wayuwuyala fumbi yawo. L'okongo diku, vo wayutumba, wayontemola lu dihuli ne. 8 Ndi akawasha sheki y'ahamelu k'uhekeli. Okone Abarahama akuti Isaka, akawahemia uhekeli lushi l'enanei. Isaka akuti Jakoba. Jakoba akuti watshesu dikumi la ahendi.

9 Watshe su wakuki Josefu kandjema, wakūsundja utsha le Edjibitu. Unyashungu aki la ndi. 10 Ndi akūshimbela uma l'asui andi tshe, akawusha kenemo la yimba la ntundu ka Farayo, khum'ekanga ka Edjibitu; ako lakawete umbuledi w'Edjibitu ndu wa lu

ETSHA WA ATUMAMI

luudu landi tshe. 11 Ndjala ka kasha kakayala lu kete ya Edjibitu tshe la ya Kanana, ndu asui a waki. Watshesu komena mbu ya nde. 12 Keli lam'akuki Jakoba ati: L'Edjibitu keli mbu ya nde, ndi akatumi watshesu etena ka ntundu. 13 L'etena ka hendi, Josefu akayashula le anangu. Farayo akenyi wudja wa Josefu. 14 Josefu akatumi diui, aketi Jakoba, shi, ndu asikandi tshe, waki antu akumi esambeli la atanu. 15 Jakoba akatshu l'Edjibitu. Ndi akatuvu ndi la watshesu. 16 Vo wakátóle la Shekeme, wakákhunde lu diumbu diakasumbi Abarahama la Shekeme la fesa, uma le ana wa Hamora.

17 Keli lam'akasukana etena ka nshidiya daka diakalaki Unyashungu Abarahama, antu wakatana, wakafulanela lu Edjibitu; 18 edja ndu lam'akayala khum'ekanga kekina l'Edjibitu, laki kumbeya Josefu. 19 Ndi akakesaka wudja asu; wakatsheleka watshesu kolo, dia vo mbikadjaka an'awo w'ashashi dia vo mvo. 20 L'eleku kako, kakawuti Mose. Ndi aki dimena diahangone la ntundu ka Unyashungu. Wakúlesha ngondo shatu lu luudu la shi. 21 Lam'akawawukadja, ona umuntu a Farayo akótongona, akawudia uku on'andi. 22 Waketsha Mose yimba tshe y'asi Edjibitu. Ndi aki wulu lu aui andi la lu etsha andi.

23 Keli lam'akandayala deku akumi anei, kanyi yakayala l'utema andi dia ntsho dia ntenda anangu, asi Isariyele. 24 Lam'akandenyi usikandi asuwa, ndi akúkimanyia; akasombweya one lakasuwaka, akadiaki usi Edjibitu. 25 Ndi akakani ati: Asikami wambeya vati: Unyashungu ambáshimbela l'anya ami, keli vo kumbeya osoku. 26 La wedi a pindju, ndi akatumbela wane wakalokaka, akahimbi mbashimba; akati ati: Wayone, tuku untu la onangu mbenyu; okoko wana watshanelanyu kolo? 27 Keli one lakatshele usikandi kolo, akúsukula ati: Akakete umbuledi la umbadi asu na? 28 We nangaka ndjakami, uku akayadiaki usi Edjibitu lui? 29 Lam'akuki Mose diui so, ndi akalawo; akayala uku ongendagenda lu kete ya Midiyana, akatuta ana apami ahendi leko.

30 Lam'akakuki deku akumi anei, ondjelo akene le ndi l'usui wa shenga wa l'Ukungu wa Sinai, lu lumi la dja lu dikumbu. 31 Lam'akenyi Mose dikambu so, ndi akambi dia enelo kako. Lam'akandasukana dia ntenda, diui diakayi le ndi ati: 32 Dimi Unyashungu a watshewe, Unyashungu wa Abarahama, la Isaka la Jakoba. Ku Mose

akadidima, kundjala la dihunga dia dienda. 33 Khumadiondjo akawutela ati: Unya sabata uma l'ekulu aye, ne dia dihuli diemadiye dieko kete y'ekila. 34 Mete, dimi lambena asui w'antu ami weli l'Edjibitu. Dimi lambuka akhumu awo. Dimi lambuhulo dia ndjashimbela. Yaka lindu, nkutumi l'Edjibitu.

35 Mose, one lakawatuni vati: Ambukete umbuledi la umbadi na? Unyashungu akútumi dia ndi ndjala umbuledi la ushimbedi. Ndi akatshi dikambu ne la lunya l'ondjelo wakene le ndi lu dikumbu. 36 Untu ako akatumbi la wo, lam'akandatshaka akambu wa mamba la tulimbitelu l'Edjibitu, edja ndu l'Uduwa a Tilili, ndu l'usui wa shenga deku akumi anei. 37 Mose ako lakatela asi Isariyele ati: Unyashungu ayunyutundjiya umvutshi uma l'atei w'anyanyu uku dimi. 38 Nd'ako kaki la Ekeleziya l'usui, la ondjelo wakateketaka la ndi l'Ukungu wa Sinai, ndu la watshesu. Nd'ako kakalungula elemba wa lumu dia ntusha. 39 Watshesu kunkitanyia aui andi, keli wakúsukula. Etema awo wakakalula l'Edjibitu. 40 Vo wakatela Arona vati: Ututsheli ditemolatemola dia ntsho la ntundu kasu. Ne dia shu hateyi okone wambuyala Mose one lakatutundja uma lu kete y'Edjibitu. 41 Lu nshi sho, vo wakatshi efanelu k'osongo a ngombe, wakalambula ekishi kako elambu. Vo wakangenangena dia elimu w'anya awo. 42 Keli Unyashungu akawaediya okongo, akákimo dia vo nkambela ului a diango dia l'ulungu ulimu. Uku akafundama lu abuku ati: Nyu khumbu ka Isariyele, Lam'akinyu l'usui deku akumi anei, Nyakanambula nyama ya ludiaka la elambu ekina uka? 43 Nyakembe etumbu ka Moloka, Ndu yoto ya etemolatemola Refana, Dikishi diakanyatshi dia ditemola; Dimi layunyotola l'okongo a Babilona. 44 Watshesu waki la etumbu ka omenyi l'usui, uku akadjanga one lakateketaka la Mose ati: Ukitsi uku efanelu kakayenyi. 45 L'etena kawo, watshesu ndu Jashua wakakiela lam'akawakumi lu kete y'asi wedja, wane wakanya Unyashungu uma lu ashu a watshesu, edja ndu lu nshi ya Davidi, 46 ako lakalemiamu lu ashu wa Unyashungu, akalombe dia ndi ntanela Unyashungu a Jakoba edjaselu. 47 Keli Solomona akúhikela luudu. 48 Keli Khum'Ulungu hatudjaseka lu mvudu yakawahiki l'anya, uku akati umvutshi ati: 49 Ulungu eli kiti kami ka diulelu, Kete yeli kihuna k'ekulu ami. Wuhu akona wa luudu wayunyumpikela?

mbata Khumadiondjo. Kana dihuli diakona diatumuyalaka? 50 Undi, lunya lami kuntsha diango ne tshe uka?

51 Nyu akanga w'ete wulu, nyeli la etema la atui wuhedia. Nyu nyatutumaka Nyuma k'Ekila nshi tshe. Nyatutshaka uku akatshaka watshenyu. 52 Umvutshi akona waki watshenyu kumbusuya? Vo wakadiaki wane wakati ntundu vati: One leli Ololo, ayuya. Kakiane nyu nyambuyala afungi la andjaki andi. 53 Nyu nyakalungula elemba uku akandjanga ondjelo, keli nyu kumbekitanyia.

Wambuka Stefano Ave

54 Lam'akawuki aui aso, etema awo wakaluli too la ududu, wakayalumata lu dikambu diandi. 55 Keli ndi akaluli la Nyuma k'Ekila, akendi l'ulungu tee, akenyi lutumbu la Unyashungu, la Jesu emadi lu lunya la pami la Unyashungu. 56 Ndi akati ati: Enda, dimi lambena ulungu ambudiho la On'a untu emadi lu lunya la pami la Unyashungu. 57 Keli vo wakahangohango, wakadihi atui, wakũhunguswela kame. 58 Vo wakũtundja uma l'usumba, wakatuwuka ave. Emenyi a dikambu so wakakitsha ahondo awo l'ekulu wa olongo a pami, lukumbu landi Saulu. 59 Lam'akawuki Stefano ave, ndi akalombe ati: Khumadiondjo Jesu, ulunguli lumu lami. 60 Ku ndi akakhuse adui, akati la diui dia wulu ati: Khumadiondjo, tãkitshiyaki kolo kene. Lam'akandati diui so, ndi akavu.

8

Wambusuya, Wambuhandjula Ekelezia

Lushi lako wakatatela nsuya Ekelezia wa la Jerusalema wulu. Vo wakahandjwama lu beke tshe dia Judiya la Samariya, tshikima atumami mbakatshikala. 2 Antu w'ololo mbakakhunde Stefano. Vo wakuleli efula. 3 Keli Saulu akalanya Ekelezia. Ndi akoto lu luudu la luudu, akakutula apami la amantu, akawadji lu lukanu.

4 Wane wakadiangana, wakakindula lu dihuli la dihuli, watasambisha diui dia lukumu l'ololo. 5 Filipo akatshu l'usumba wa Samariya, akawatela dikambu dia Kristu. 6 Lam'akuki, ndu lam'akenyi antu tulimbitelu takatshaka Filipo, vo wakahukama aui wakandati l'utema otoi, 7 ne dia edienge waki l'etema w'antu efula, wakatumbi, wakahangohango wulu. Akanga a dikhunye efula la waki tshumbi, wakakono. 8 Ku ongenongeno efula akayala l'usumba ako.

Simona Kanga Aloho

9 Keli pami kemotshi, lukumbu landi Simona, lakatshaka akambu w'aloho la ntundu l'usumba ako, akambiaka asi Samariya; akayati ati: Untu a wuki kemi. 10 Vo tshe wakũhukama, ndu wa tshitshe ndu wa waki, wakati vati: Untu one eko wulu a Unyashungu, wetawo vati: Wuki. 11 Vo wakũhukama, ne dia ndi akawambia la aloho andi edja. 12 Keli lam'akawetawo Filipo lakãsambishaka dia lukumu l'ololo la diulelu dia Unyashungu la lukumbu la Jesu Kristu, apami la amantu wakabatizama. 13 Ndu Simona ndame aketawo. Ndi akabatizama, akatshikala la Filipo. Ndi akambi lam'akandenyi tulimbitelu la akambu wa mamba a waki wakatshama.

14 Lam'akuki atumami waki la Jerusalema vati: Asi Samariya wambetawo diui dia Unyashungu, vo wakãtumela Petero la Joani. 15 Lam'akawakumi, vo wakãlombela dia vo nungula Nyuma k'Ekila. 16 Ne dia laso, ku Nyuma k'Ekila atahulo le wo, tshikima batizama tshu lu lukumbu la Khumadiondjo Jesu. 17 Petero la Joani wakawahe anya, ku vo wakahungula Nyuma k'Ekila. 18 Lam'akenyi Simona ati: Ahelu k'anya ka atumami kambuwasha Nyuma k'Ekila, ndi akawasha falanga, 19 ati: Nyumbisha ndu dimi wulu one, dia untu tshe layumahe anya, ku ndi nungula Nyuma k'Ekila. 20 Keli Petero akawutela ati: Fesa yaye yavu la ye! ne dia we ambukana wati: Dimi layulungula ushasha a Unyashungu la falanga. 21 We kema la etenyi kana leke lu dikambu ne, ne dia utema aye kema ololo lu ashu a Unyashungu. 22 Okone ukadimuli utema uma lu kolo kene, olombe Khumadiondjo, kana ndi ayukudimanyia tukanyi ta utema aye. 23 Ne dia dimi lambena nti: We eko la losongu l'ululu ndu lu dimama di'akambu wa kolo. 24 Simona akũkaluya diui ati: Nyonombele Khumadiondjo, akambu wutshinyu tawuyalaki le mi.

Petero la Joani Wambusambisha lu Ngelu Efula ya la Samariya

25 Lam'akawashili menya la mvutela antu diui dia Khumadiondjo, vo wakakalula la Jerusalema; wakasambisha lu ngelu efula y'asi Samariya lukumu l'ololo.

Filipo la Usi Etiyopiya

26 Keli ondjelo wa Khumadiondjo akatela Filipo ati: Unela, utshu utsha lu leke la diku dia kushi, lu mbuka kuyi uma la

ETSHA WA ATUMAMI

Jerusalema utsha la Ngaza. Dihuli diako dieko shenga. 27 Ndi akunela, akatshu. Nyulungi, kanga olenga, usi Etiyopiya, aki untu a wuki l'okongo a Kandake, khum'ekanga ka umuntu k'asi Etiyopiya. Ndi kaki ulami a diango diandi tshe, akayi la Jerusalema dia ndjotemola. 28 Ndi akatakululaka udjashi lu pusupusu, atali buku dia umvutshi Isaya. 29 Nyuma akatela Filipo ati: Usukani, utuhumani la pusupusu keku. 30 Filipo akasamanya utsha le ndi, akawuki ala buku di'umvutshi Isaya. Ndi akawumbula ati: We nimbittelaka kene kalaye? 31 Ku ndi akukaluya diui ati: Ukundi eyami nimbittela, aha paka untu konombodi? Ndi akasengasenga Filipo ati: Mbela, yudjase la mi. 32 Etenyi k'afundelu kakandalaka, kaki okone ati: Ndi akalombwama utsha lu dihuli diatuwudiakaka nyama uku okoko; Uku ona okoko ambolembobala la ntundu k'uhimbudi a diosa. Okone ndi kunfula unyo andi. 33 Uma l'ekitshakitshamelu kandi, wakanya elumbwelu kandi. Akona ayokondwela wa lu lolonga landi? Ne dia wakokosola lumu uma la kete. 34 Kanga olenga akatela Filipo ati: Dimi lambukolomba nti: Umvuteli dia umvutshi akona watandi? Ndame, kana untu ukina? 35 Filipo akafula unyo, akatatela uma l'afundelu kako, akusambisha lukumu l'ololo la Jesu. 36 Lam'akawatatshokaka lu mbuka, kanga olenga akati ati: Enda, tuku ashi ane! Kakona kanshimba dimi mbatizama? 37 Filipo akati ati: Naka we ambetawo l'utema aye tshe, keti we ayubatizama. Ndi akukaluya diui ati: Dimi lambetawo nti: Jesu Kristu eko On'a Unyashungu. 38 Ndi akati ati: Eme pusupusu. Vo ahendi wakoto lu ashi, ndu Filipo ndu kanga olenga. Ndi akubatiza. 39 Lam'akawatumbi uma l'ashi, Nyuma ka Khumadiondjo akatole Filipo am'akina. Kanga olenga kumbena ntu, ne dia ndi akatshu, atangenangena. 40 Keli Filipo akenama la Azoto. Ndi aketi lu esumba tshe, edja ndu lam'akandakumi la Kayisariya, atasambisha lukumu l'ololo.

Ekadimwelu k'Utema a Saulu (Ets. 22:6-16; 26:12-18)

9 Saulu akanela ambeki wa Khumadiondjo dia mbadiaka. Ndi akatshu le olombedi a ladiku; 2 akolombe mikanda wa ntsho lu temwelo dia la Damaseke, dia ndi mbela wayundutana wa lu Mbuka keso, kana apami kana amantu lu ekodi, uya la Jerusalema. 3 Lam'akandatshokaka, ndi akakumi lasuki la Damaseke. Usasi w'uma l'ulungu akohetela shashimuya. 4 Ndi akako la kete. Ndi akuki

diui diawutela ati: Saulu, Saulu, okoko wana wansuyaye? 5 Ndi akati ati: Khumadiondjo, we na? Ndi akati ati: Dimi Jesu, kasuyaye. 6 Keli, unela, utshu utsha l'usumba, wayutukutela dikambu diahumbaye ntsha. 7 Antu wakatatshokaka la ndi wakemala ki. Vo wakuki diui, keli komena untu. 8 Saulu akunela uma la kete. Lam'akadiho ashu andi, ndi komena nduku engo. Vo wakukimela lu lunya, wakolombola edja ndu la Damaseke. 9 Akayala nshi shatu, ndi komena, konde, kono.

Ananiya Ambutsho la Ntenda Saulu

10 La Damaseke kaki umbeki, lukumbu landi Ananiya. Khumadiondjo akaweti l'enelo ati: Ananiya! Ndi aketawo ati: Khumadiondjo, dim'one. 11 Khumadiondjo akawutela ati: Unela, utshu l'osese wetawo vati: w'Usimbwi, lu luudu la Judasi, utumbuli untu, lukumbu landi Saulu, usi Taraso kendi. Ulungi, ndi eko lu nomba. 12 Ndu Saulu akenyi Ananiya ayoto, awahe anya dia ndi mena. 13 Keli Ananiya akakaluya diui ati: Khumadiondjo, antu efula wambumvutela dia pami keso, ne dia akambu wa kolo efula wakandatshela ekilami aye wa la Jerusalema. 14 Ndu lane, ndi la wulu uma le elombedi a waki dia kheleka tshe watetaka lukumbu laye. 15 Keli Khumadiondjo akawutela ati: Tshoka, ne dia ndi eko usi ulimu lambumusunola, dia ndi ntsho la lukumbu lami la ntundu k'asi wedja la ka khumi ya dikanga, ndu le asi Isariyele, 16 ne dia dimi layuwenya akambu efula wayundusuwa dia lukumbu lami. 17 Ananiya akatshu, akoto lu luudu. Ndi akawahe anya, akati ati: Onalingu Saulu, Khumadiondjo Jesu ndame, lakene le ye lu mbuka lam'akayayakaka, kuntumi dia we mena, la dia we ndudiana la Nyuma k'Ekila. 18 Kem'edja, diango uku kaya diakamo uma lu ashu andi, ku ndi akenyi. Ndi akunela, akabatizama. 19 Ndi akali, akakikitala.

Saulu Ambusambisha la Damaseke

Saulu akatshikala la ambeki waki la Damaseke nshi motshi. 20 Kem'edja ndi akasambisha dikambu dia Jesu lu temwelo ati: On'a Unyashungu kendi. 21 Waku tshe wakuki diui diandi wakambi, wata vati: Aha lakamani wane waketaka lukumbu lone la Jerusalema one? Ndi ambuya lindu dia dikambu diako, dia ndi mbatola wukelekami la ntundu k'elombedi a waki. 22 Keli Saulu akaluli la wulu, akatewadia asi Juda wakaladi la Damaseke; akawatela hwe ati: Jesu keli Kristu.

Ambuhanda Uma le Asi Juda

23 Lam'aketi nshi efula, asi Juda wakadji sheki ya ndjaka Saulu. 24 Keli Saulu akeyi sheki yawo. Vo wakalami asuku la yanyi ndu l'utshu dia vo mbudiaka. 25 Keli ambeki andi wakawose l'utshu, wakawomoya lu ushu a lukumbu, wakuhuluya lu saka.

Anyandi Wambâtuma Utsha la Taraso

26 Lam'akakumi Saulu la Jerusalema, ndi akayangi mbekesanela la ambeki. Vo tshe wakawuki woma, kumbetawo vati: Umbeki mbendi. 27 Keli Baranaba akawose, akatshu la ndi le atumami, akawatela uku akene Khumadiondjo le ndi lu mbuka, la uku akateketa Khumadiondjo la ndi; ndu uku akandasambisha la dihunga lu lukumbu la Jesu la Damaseke. 28 Lam'akindi la Jerusalema, ndi akotoka, akatumbaka la wo. 29 Ndi akasambishaka la dihunga lu lukumbu la Khumadiondjo. Ndi akateketa la asi Juda wa lu leke la Ngirika, akadji la wo tamu. Keli vo wakayangaka mbudiaka. 30 Lam'akeyi anyandi dikambu so, vo wakûshindela utsha la Kayisariya, wakûtumi utsha la Taraso.

31 Okone Ekeleziya wa la Judiya tshe la wa la Ngalili ndu wa la Samariya waki ki, wakuli; wakakendakendaka la woma a Khumadiondjo la lu ekikitshelu ka Nyuma k'Eki la, wakafuli.

Petero Ambokonoya Ayinea

32 Lam'akakindula Petero lu beke tshe, ndi akayi ndu la ekilami wa la Luda. 33 Ndi akenyi untu, lukumbu landi Ayinea, leko, laketama lu tangi deku enanei, ne dia ndi aki la ekhunye. 34 Petero akawutela ati: Ayinea, Jesu Kristu ambukokonoya. Eto, olongosole tangi kaye. Kem'edja ndi aketo. 35 Asi Luda tshe la asi Sharona wakawenyi, wakakadimo le Khumadiondjo.

Ambulula Doroka Uma lu Nyoi

36 La Jopa kaki umbeki a umuntu, lukumbu landi Tabita, nkadimula ati: Doroka, kana Lufumbo. Umuntu ako akatshaka akambu w'ololo efula ndu akambu wa ketshi. 37 Lu nshi sho, ndi akuki kandji, akavu. Lam'akawashidiya mbôtsha, vo wakawetamia lu luudu la ladiku. 38 Luda aki lasuki la Jopa. Ku lam'akuki ambeki vati: Petero eko leko, vo wakatumi apami ahendi dia ntôsengasenga vati: Tutshimbatsimbaki dia ndja le su. 39 Petero akunela, akatshu la wo. Lam'akandakumi, vo wakatshu la ndi lu luudu lako la ladiku. Wadi waki edu tshe

wakemala la suki la ndi, walela; wakawenya akoti la ahondo wakatshi Doroka lam'akindi la wo. 40 Keli Petero akâtundja tshe, akakhuse adui, akalombe, akingiso le udu; akati ati: Tabita, eto. Ku ndi akadihula ashu. Lam'akandenyi Petero, ndi akasungukala. 41 Petero akoleke lunya, akawunyia. Ndi aketi ekilami la wadi waki edu, akawaenyandi la lumu. 42 Dikambu diako diakeyama la Jopa tshe. Antu efula waketawo Khumadiondjo. 43 Petero aketama nshi kambi la Jopa laka Simona, olongosodi a dikuhu.

Koneliyo, Olombodi w'Alimbi

10 La Kayisariya kaki pami kemotshi, lukumbu landi Koneliyo, laki olombodi w'ului w'alimbi wakawetaka vati: W'asi Italiya. 2 Ndi aki untu ololo, akukaka Unyashungu woma, ndi la wa lu luudu landi tshe. Ndi akashaka antu diango efula la ketshi, akalombaka Unyashungu nshi tshe. 3 Lam'aki unya l'eshidi esatu la dikolo, ondjelo wa Unyashungu akawotwela; akaweti l'enelo ati: Koneliyo! 4 Ndi akawendi tee, akuki woma; akati ati: Khumadiondjo, nem'eku? Ondjelo akawutela ati: Dombelo diaye la diango diatuyushanaka la ketshi diambumbela uku euhwelu lu ashu wa Unyashungu. 5 Kakiane, utumi apami la Jopa, watuyi la Simona, lukumbu landi lukina Petero. 6 Laka Simona, olongosodi a dikuhu, kuhangindi. Luudu landi leko l'umamu w'ashi a waki. 7 Lam'akamo ondjelo wakateketaka la ndi, ndi aketi ekambi andi ehendi, ndu dimbi di'ololo, diakayalaka lasuki la ndi nshi tshe. 8 Lam'akandawatela akambu aso tshe, ndi akâtumi utsha la Jopa.

Petero Ambena Enelo

9 La wedi a pindju, vo wakatshu lu mbuka. Lam'akawasukana l'usumba, Petero akambela ladiku dia luudu dia ntolomba. Unya aki l'atei w'ote. 10 Ndi akuki ndjala, akalangi nde. Keli lam'akawalongosolaka ma, ndi akako la yimbatshimba. 11 Ndi akenyi ulungu ambudiho, la engo uku dihondo dia wuki diayahulo uya la kete, diukimamedi lu atshuku adio anei. 12 Loko kaki wehu tshe wa nyama y'ekulu enei, la diango diayakutula la kete la fudu ya l'ulungu. 13 Ndi akuki diui ati: Petero, eto! udiaki, uli. 14 Keli Petero akati ati: Kema, Khumadiondjo, dimi halatolekaka engo k'engo, ndu keli mindu. 15 Diui diakayi le ndi etena ka hendi ati: Tetaki kene kakedia Unyashungu wati: Engo k'engo. 16 Wakatshi osoku tena satu. Kem'edja, engo kako

ETSHA WA ATUMAMI

kakakaluyama utsha l'ulungu.

Antu Wambuya le Petero Uma le Koneliyo

17 Lam'akakanana Petero l'utema ati: Ukundi eli enelo keniyimi keku? Ku apami wakatumi Koneliyo, lam'akawashili mumbula luudu la Simona, wakemala la suku; 18 waketi, wakambula kana Simona letawo vati: Petero mpanga loko. 19 Lam'akakanana Petero dia enelo keso, Nyuma akawutela ati: Enda, apami asatu wakuyanga. 20 Keli unela, uhulo l'esi. Utshu la wo, tukandakandaki, ne dia dimi lambatuma. 21 Petero akahangu le apami ako, akati ati: Enda, dimi layanganyu one. Dikambu diakona diuyenyu? 22 Vo wakati vati: Koneliyo, olombodi w'alimbi, untu ololo, luka Unyashungu woma, lukumu landi leko ololo lu wudja tshe w'asi Juda, ondjelo w'ekila akawutela dia nketa lakandi, la dia mbuka aui aye. 23 Okone Petero akawaeti, akahanga.

Petero Ambukalula la Wo

La wedi a pindju, Petero akunela, akatshu la wo; ndu anyawo amotshi uma la Jopa wakutshindela. 24 La wedi a pindju, vo wakakumi la Kayisariya. Koneliyo akalungula, aketi wa lu khumbu kandi tshe la engenyi andi. 25 Lam'akoto Petero, Koneliyo akulungula, akayakosha l'ekulu andi, akotemola. 26 Keli Petero akawuniya ati: Unela, ndu dimi keli untu. 27 Lam'akandateketaka la ndi, ndi akoto, akatani antu efula loko. 28 Ndi akawatela ati: Nyu mbeyaka nyati: Dikambu dia usi Juda mbekesanela la usi wudja ukina, kana mboto lu luudu landi, eko ekila. Keli Unyashungu ambomenya ati: Tetaki nduku untu wati: Untu k'untu, kana kanga mindu. 29 Uma lu dikambu so, mbuyemi. Lam'akawambetshi, dimi konseka. Okone lambunyumbula diumbetshinyu.

30 Koneliyo akati ati: Nshi nyei yambeta, lam'aki unya uku l'ushidi one, lam'akamalombaka lu eshidi esatu lu luudu lami, nyulungi, pami kemotshi akemala la ntundu kami olotshi ahondo wa ngaingai. 31 Ndi akati ati: Koneliyo, Unyashungu ambuka dombelo diaye. Ndi mbuhoka diango diatuyushanyaka la ketshi. 32 Okone utumi diui la Jopa dia nteta Simona, letawo vati: Petero. Laka Simona, olongosodi a dikuhu, kuhangindi, l'umamu w'ashi a wuki. 33 Okone mbakamakutemela diui esadi. We akatshi ololo, ne dia we ambuya. Shu tshe teko lindu kakiane lu ashu wa Unyashungu,

dia mbuka akambu tshe wakakutela Khumadiondjo.

34 Petero akafula unyo, akati ati: Mete, dimi lambeya nti: Unyashungu kema la shonodi y'antu. 35 Keli ndi mbetawoka wa lu wedja tshe, wane wawuka woma la watsha akambu w'ololo. 36 Ndi kakatumela asi Isariyele diui, kakasambisha lukumu l'ololo la ki uma le Jesu Kristu (ndi keli uwandji wa kete tshe). 37 Nyame mbeyaka diui ne, diakadiangana la Judiya tshe, akatatela uma la Ngalili, l'okongo a batiza kakasambishaka Joani, 38 dia Jesu y'usi Nazareta, uku akuludia Unyashungu la Nyuma k'Ekila ndu la wulu. Ndi akakindulaka atatshi akambu w'ololo, atakonoya wane tshe wakasuyamaka le uhimbanyi, ne dia Unyashungu aki la ndi. 39 Shu teko emenyi w'akambu tshe wakandatshi lu leke l'asi Juda, ndu la Jerusalem. Vo wakudiaki, wakuhane l'utamba. 40 Unyashungu akawulula lushi la satu; aketawo dia ndi menama, 41 aha le antu tshe, keli paka le su, shu wane wakasonwama le Unyashungu, uku emenyi; shu wane wakalekaka la ndi, wakanokaka la ndi lam'akandulo uma lu nyoi. 42 Ndi akatokokomiya ati: Nyusambisha antu, nyuwaenya nyati: Ndi akasonwama le Unyashungu, dia ndjala umbuledi a wasena la wakavu. 43. Amvutshi tshe wambuwuta vati: Untu tshe lawetawo, ayulungula edimanyelu ka kolo lu lukumbu landi.

Ambuki w'Aui Andi Wambulungula Nyuma k'Ekila

44 Lam'akati Petero aui aso, Nyuma k'Ekila akahulwela tshe wakuki diui. 45 Wane waketawo, waki ambahemi wa ehekali, wakayi le Petero, wakambi, ne dia wakatshulwela ndu asi wedja ushasha a Nyuma k'Ekila. 46 Ne dia vo wakawauki wateketa lu eteketa ekina; watumula Unyashungu. Ku Petero akakaluya diui ati; 47 Untu akona aki la wulu wa nshimba wane wakalungula Nyuma k'Ekila uku shu, dia mbatizama l'ashi? 48 Ndi akati ati: Wabatizami lu lukumbu la Jesu Kristu. Ku vo wakolombe dia ndi ntshikala la wo nshi motshi.

Petero Ambuyateketela Dia Akambu Wakandatshi

11 Atumami la anyawo waki la Judiya wakuki vati: Ndu asi wedja wambulungula diui dia Unyashungu. 2 Lam'akayi Petero la Jerusalem,

ambahemi w'ehekali wakadji la ndi tamu, 3 wata vati: Okoko wana wakayatshu le wane wahatahema ehekali, ndu wakayali la wo ma? 4 Keli Petero akatatela mbatela dikambu diako ati: 5 Dimi laki l'usumba wa Jopa lalomba. Lam'akimi la yimbatshimba, dimi lakenyi enelo: engo kakahulo uku dihondo uma l'ulungu, diukimamedi lu atshuku anei; diakampulwela. 6 Lam'akamadiendi tee, dimi lakadilimbetela, lakenyi nyama y'ekulu enei ya la kete, la nyama ya l'ukunda, la diango diayakutula, la fudu ya l'ulungu. 7 Dimi lakuki ndu diui diamvutela ati: Petero, eto! udiaki, uli. 8 Keli dimi lakati nti: Kema, Khumadiondjo, nduku engo k'engo, kana ka mindu, kakoto l'unyo ami. 9 Keli diui diakayi uma l'ulungu etena ka hendi ati: Tetaki kene kakedia Unyashungu wati: Engo k'engo. 10 Dikambu so diakatshama tena satu. Diango tshe diakakutwama utsha l'ulungu ntu. 11 Nyulungi, kem'edja, apami wakawatumi le mi uma la Kayisariya wakemala la ntundu ka luudu lone akisu. 12 Nyuma akamvutela ati: Tshoka la wo, tuyalaki la shonodi. Ndu anyasu ane asamalu wakatshindela; takoto lu luudu la pami kako. 13 Ndi akatatela uku akandenyi ondjelo emadi lu luudu landi, ndu uku akandawutela ati: Utumi antu la Jopa watuyi la Simona, lukumbu landi lukina Petero. 14 Ndi ayukutela aui wa nkushimbela, we la wa lu luudu laye tshe. 15 Lam'akamatatela nteketa, Nyuma k'Ekila akahulwela, uku akandatulwela uma l'etatelu. 16 Ku dimi lakuhu diui dia Khumadiondjo, diakandati ati: Mete, Joani akabatizaka l'ashi, keli nyu nyayubatzama la Nyuma k'Ekila. 17 Okone naka Unyashungu akawasha ushasha uku akandatusha, lam'akatetawo Khumadiondjo Jesu Kristu, dimi laki na, dia nsemanela la Unyashungu? 18 Lam'akawuki akambu aso, vo wakalembobhala, wakatumbula Unyashungu; wakati vati: Unyashungu ambusha ndu asi wedja ekadimwelu k'etema utsha lu lumu.

***Wakatatela Mbata Ambeki Vati:
"Asika Kristu", l'Atiyoka***

19 Wane wakahandjo ne dia asui wakayala dia nyoai ka Stefano, wakatshu la Fonikiya la Kupiro la Atiyoka. Vo kumvutela nduku untu diui, tshikima asi Juda atu. 20 Keli amotshi awo waki asi Kupiro la asi Kurene wakayi l'Atiyoka, wakasambisha ndu asi Ngririka lukumu l'ololo la Khumadiondjo Jesu. 21 Lunya la Khumadiondjo laki la wo. Antu efula waketawo, wakakadimo le Khumadiondjo.

22 Lukumu la dikambu diawo lakakumi l'atui w'Ekelezia waki la Jerusalema, ku vo wakatumi Baranaba pulu ndu l'Atiyoka. 23 Lam'akandakumi, lam'akandenyi ngandji ka mamba ka Unyashungu, ndi akangenangena, akakokomiya vo tshe ati: Nyumamemi Khumadiondjo la esangwelu l'etema. 24 Ne dia ndi aki untu ololo, lakaluli la Nyuma k'Ekila ndu la mbetawo, ku antu efula wakasanganyema le Khumadiondjo. 25 Okone Baranaba akatshu la Taraso dia ntuyanga Saulu. 26 Lam'akandatuwushula, ndi akayi la ndi l'Atiyoka. Vo wakasangana la Ekelezia utundu w'eleku. Vo waketsha antu efula, wakatatela mbeta ambeki vati: Asika Kristu lu Atiyoka.

27 Lu nshi sho, amvutshi amotshi w'uma la Jerusalema wakayi l'Atiyoka. 28 Omotshi, lukumbu landi Angabo, akemala. Nyuma akawenya ati: Ndjala ka kasha ka wulu kayuyala lu kete tshe. Mete, to kakayi lu nshi ya Kolodiyo. 29 Ambeki tshe, untu la untu uku wulu andi, wakasanguya dia ntumela anyawo wakaladi la Judiya diango dia mbakimanya. 30 Vo wakatshi okone: wakatumbela dikumanyi diango l'anya wa Baranaba la Saulu.

***Herode Ambudiaka Jakoba, Ambudja
Petero lu Lukanu, Ondjelo
Ambutshungula Petero***

12 Lu nshi sho, khum'ekanga Herode akandi asi Ekelezia amotshi dia mbasuya. 2 Ndi akadiaki Jakoba, onangu Joani, la yombo. 3 Lam'akandenyi ati: Dikambu ne diambongenyanganya asi Juda, ndi akandi ndu Petero. Nshi yako, yaki nshi ya Ma Diahla la Edya. 4 Lam'akandawundi, ndi akukimo le enongo enei w'alimbi dia mbulama. Ndi akalangi dia mbela le antu l'okongo w'Elekanelu. 5 Dia dikambu so, mbakalamema Petero lu lukanu, keli Ekelezia kumpeko mbolombela Unyashungu.

6 L'utshu a lushi lakalangi Herode ntundja Petero, Petero aketami l'atei w'alimbi ahendi, ukelekami molola ehendi. La suku kaki alami wakalamaka luudu la lukanu. 7 Nyulungi, ondjelo wa Khumadiondjo akemala la le ndi, ku usasi akahete lu luudu. Ondjelo akahumela Petero lu luhandju, akawemula; akati ati: Unela esadi! Ku molola wakamo uma lu anya. 8 Ondjelo akawutela ati: Olote uya, udji tupapa. Ndi akatshi osoku. Ku ndi akawutela ati: Udji koti diaye, undjeli. 9 Ndi akatumbi, akuyeli. Ndi kumbeya ati: Kene katsha ondjelo mete keto; keli ndi akakani ati: Enelo

ETSHA WA ATUMAMI

kenami. 10 Lam'akawalekana elamelu ka ntundu la ka hendi, vo wakakumi lu lukuki la luwulu ladihulawo utsha l'usumba; lo lakadiho. Ku vo wakatumbi, waketi l'osese wame. Kem'edja, ondjelo akûtsihiki. 11 Lam'akeyi Petero dikambu diako ololo, ndi akati ati: Kakiane, dimi lambeya mete nti: Khumadiondjo ambutuma ondjelo andi, ambutshungula uma l'anya wa Herode.

12 Lam'akandatakanaka yimba dia dikambu diako, ndi akakumi lu luudu la Mariya, nyangu Joani, laki la lukumbu landi lukina Mako. Loko kakasangana antu efula wakalombaka. 13 Lam'akandakokola lu lukuki, ukambi a umuntu, lukumbu landi Roda, akatshu, aketawo. 14 Lam'akanduki diui dia Petero, ndi kundjihula lukuki ne dia ongenongeneno, keli akalawo utsha lu luudu; akati ati: Petero one emadi la suku! 15 Vo wakawutela vati: We ambudjo. Keli ndi akâkokomiya ati: Mete. Vo wakati vati: Ondjelo andi oso! 16 Keli Petero akatetemala nkokola. Lam'akawadihula, vo wakawenyi, wakambi. 17 Keli ndi akâhahiya lunya dia vo nembohala. Ndi akawatela uku akutshungudi Khumadiondjo uma lu luudu la lukanu. Ndi akati ati: Nyuteli Jakoba la anyasu akambu ane. Ku ndi akamo, akatshu lu dihuli dikina.

18 La pindju, alimbi wakahalaka dia mbeya wuhu wambuyala Petero. 19 Herode akûyangi, keli ndi kumbena. Ndi akambula alami, akati dia mbadiaka. Ku ndi akamo uma la Judiya, akatshu utsha la Kayisariya, akatudjase leko.

Nyoi ka Herode

20 Asi Tura la asi Sidona wakanyangia Herode wulu. Ku vo wakekesanela la Balasto, ulami a diango dia Khum'ekanga. Vo wakayi le Herode la utema otoi, wakalombe dia ndjala ki, ne dia leke la khum'ekanga lakaleshaka leke lawo. 21 Lam'akakuki lushi lakawasonola, Herode akalote ahondo wa diulelu, akadjase lu kiti ka diulelu, akâhangohangwela. 22 Antu wakadji dielu vati: Diui dia etemolatemola kemoshti, aha dia untu! 23 Kem'edja, ondjelo wa Khumadiondjo akôkomola, ne dia ndi kuntumbula Unyashungu. Dikusu diakawoto lu dimba, ndi akavu.

24 Keli diui dia Unyashungu diakuli, diakafuli.

25 Baranaba la Saulu wakakalula uma la Jerusalem lam'akawashidiya nkimo diango. Vo wakayi la Joani, lukumbu landi lukina Mako.

Nyuma k'Ekila Ambeta Saulu la Baranaba

13 L'Ekelezia wa l'Atiyoka kaki amvutshi la embetsha, kumbu yawo Baranaba, la Simeyona, lakawetaka vati: Ningere, la Lukiyo, usi Kurene, la Manaena, lakuli la khum'ekanga Herode, la Saulu. 2 Lam'akawakambela Khumadiondjo ulimu, ndu lam'akawakili mbu ya nde, Nyuma k'Ekila akati ati: Nyonsonwele Baranaba la Saulu dia ulimu wakamawaeti. 3 Lam'akawakili mbu ya nde, vo wakalombe, wakawahe anya, ku wakâtumi.

La Kupiro, Elimasi Ambuyala Tshungu; Serengiyo Paulu Ambukadimula Utema

4 Okone Baranaba la Saulu wakatshu la Selukiya. Vo wakamo uma leko, wakateho la Kupiro. 5 Lam'akiwo la Salami, vo wakatela antu diui dia Unyashungu lu temwelo di' asi Juda. Ndu Joani akâtshindela. 6 Lam'akawakindula lu kete sho tshe edja ndu la Pafo, vo wakatani usi Juda omotshi leko, kanga aloho, umvutshi a kashi, lukumbu landi Bara-Jesu. 7 Ndi akayalaka la umbuledi, lukumbu landi Serengiyo Paulu, kanga yimba. Serengiyo Paulu aketi Baranaba la Saulu, akayangi mbuka diui dia Unyashungu. 8 Keli Elimasi (nkadimula ati: Kanga aloho) akâsike, akayangi munganyia umbuledi uma lu mbetawo. 9 Ku Saulu, letawo ntu vati: Paulu, lakaludiana la Nyuma k'Ekila, akawendi tee; 10 akati ati: We ambulula la kashi la uhukusanu, we on'a uhimbanyi, utunyi w'akambu tshe w'ololo, we haheko munganyia antu uma lu mbuka y'ololo ya Khumadiondjo? 11 Ulungi, lunya la Khumadiondjo leko le ye, we ayutukuyala tshungu, henyi unya. Kem'edja lungi la udjima akuhutamela. Ku ndi akakendakenda atayangi wane wa mbolombola la lunya. 12 Lam'akenyi umbuledi dikambu diakatshama, ndi aketawo, akambi dia wetshelu wa Khumadiondjo.

Joani Mako Ambutshika Paulu

13 Paulu la wane wakatatshokaka la ndi wakamo uma la Pafo, wakateho la Perenga ka la Pamufuliya. Joani akâtshiki, akakalula la Jerusalem. 14 Keli vo waketi uma la Perenga, wakakumi la Atiyoka wa la Pisidiya. Vo wakoto l'etemwelo lushi l'ekila, wakadjase. 15 Lam'akawashili mbala elemba la aui w'amvutshi, embuledi w'etemwelo wakâtumela diui vati: Anyasu, naka nyu la diui dia ndaka antu, nyâlaki.

16 Paulu akemala, akahahiya lunya; akati ati:

Aui wa Paulu l'Atiyoka wa la Pisidiya

Nyu asi Isariyele la nyu wane wuka Unyashungu woma, nyuhukami. 17 Unyashungu a wudja one wa Isariyele wakasonola watshesu, akawauniya lam'akiwo l'Edjibitu, akawanya uma lu kete sho la lunya la wulu. 18 Uku deku akumi anei mbakandatawaembaka l'usui uku wali. 19 Lam'akandamani wedja esambeli lu kete ya Kanana, ndi akawasha kete yawo ukito uku deku kama nyei la akumi atanu. 20 L'okongo diku, ndi akawasha embadi edja ndu le umvutshi Samuele. 21 L'okongo diku, vo wakalombe khum'ekanga. Unyashungu akawasha Saulu, on'a Kisha, uma lu diuhu dia Bendjamina, yediko ya deku akumi anei. 22 Lam'akandawunya, ndi akunyia Davidi dia ndjala khum'ekanga, one lakandati ati: Dimi lambutana Davidi, on'a Jese, one lalangami; ndi ayutsha akambu tshe uku lulangu lami. 23 Uma le tukanula tandi mbakela Unyashungu Ushimbedi Jesu le asi Isariyele, uku daka diandi. 24 Jesu atayi, Joani akasambishaka asi Isariyele tshe dikambu dia batiza ka ekadimwelu k'etema. 25 Lam'akayangi Joani nshidiya ulimu andi, ndi akati ati: Ukundi akananyu? Dimi laha ndi. One layayi l'okongo ami, dimi kema ololo wukukimi nkelekula okodi a sabata yandi.

26 Anyasu, tukanula t'Abarahama, la nyu wane wuka Unyashungu woma l'atei anyu, le su kakatumama diui ne dia panda. 27 Ne dia wane wudjashi la Jerusalema la embuledi awo, kumbêya kuyanga aui wa amvutshi watalemaka nshi y'ekila tshe. Vo wakashidiya aui ako lam'akawawâmia. 28 Kuyanga vo kumbutana la dikambu dia ndi mvo, vo wakalombe Pilata dia mbudiaka. 29 Lam'akawashidiya akambu tshe wakafundama lu dikambu diandi, vo wakûhanula uma l'utamba, wakawetamia lu diumbu. 30 Keli Unyashungu akawulula uma l'atei w'edu. 31 Wane wakayi la ndi uma la Ngali utsha la Jerusalema, wakawenyi nshi efula. Kakiane vo weko emenyi andi le antu. 32 Tambunyela lukumu l'ololo la daka diakawalaki watshesu, 33 ati: Unyashungu akashidiya daka ne le an'asu, ne dia ndi akulula Jesu, ndu uku ufundami l'usambu a hendi ati: On'ami keye, Elo kukutshimi. 34 Ne dia ndi akawulula uma lu nyoi, hakalula ntu l'chondelo. Ndi akati ati: Dimi

layunyusha etshoko w'ekila, Ndu wa mete, wakamalaki Davidi. 35 Ne dia ndi akati ndu l'usambu ukina ati: We hakimo l'Ekila dia ndi mponda. 36 Lam'akashidiya Davidi ntsha akambu wakalangi Unyashungu lu lolonga landi, ndi akavu, akakhundama kame la watshendi, akahonde. 37 Keli one lakulula Unyashungu komponda. 38 Anyasu, nyeyi nyati: Wambunyutela dikambu dia edimanyelu ka kolo yanyu uma le untu one. 39 Ndi ambuyindja untu tshe lawetawo lu akambu tshe, waki elembe wa Mose kumbuyindja. 40 Okone nyewo, dikambu diakawati lu aui w'amvutshi diatukuyala le nyu, ati: 41 Nyendi, nyu amonyodi, nyambi, nyuvu; Ne dia dimi lambutsha ulimu lu nshi yanyu, Ulimu wahanyakuki mbetawo, naka untu ayunyutela.

Wambolomba Paulu Dia Ndi Mvuta Diui Ntu Lushi l'Ekila

42 Lam'akawatumbi, vo wakasengasenga Paulu vati: Kumututela aui aso lushi l'ekila layayi. 43 Lam'akahandjo antu, asi Juda efula la embetawudi wa dikambu di'asi Juda wakiye le Paulu la Baranaba, wakâkokomiya vati: Nyutshikali lu ngandji ka mamba ka Unyashungu.

Paulu la Baranaba Wambutunama; Wambutu Vati: "Tayutsho le Asi Wedja"

44 Lushi l'ekila lukina, asi usumba efula wakasangana dia ndjuka diui dia Unyashungu. 45 Keli lam'akenyi asi Juda elui w'antu, vo wakuki kandjema. Wakadji tamu t'akambu wakati Paulu, wakôtenge. 46 Paulu la Baranaba wakatela antu diui la dihunga, vati: Diaki la su dia ntanyutedi diui dia Unyashungu ntundu, ne dia nyu nyakadituni; nyame nyambuyalumbuya nyati: Hatukuki nungula lumu la pundju. Nyulungi, shu tambukadimo le asi wedja. 47 Ne dia Khumadiondjo akatosengola okone ati: Dimi lambukukitsha usasi w'asi wedja, Dia we ndjala panda le antu, Edja ndu la kuma ka kete.

48 Lam'akuki asi wedja diui so, vo wakangenangena. Vo wakatumbula diui dia Unyashungu. Wane wakasonwama lu lumu la pundju, waketawo. 49 Diui dia Khumadiondjo diakadiangana lu leke lako tshe. 50 keli asi Juda wakatombosha amantu w'ololo waki la lukumu, ndu dihangamendi dia l'usumba, wakatombosha antu diui dsuya Paulu la Baranaba, la dia mbatshanya uma lu leke lawo. 51 Keli vo wakâhumela ditshu

ETSHA WA ATUMAMI

di'uma lu akaka awo, wakatshu la Ikoniyo. 52 Ambeki wakaluli la ongenongeno ndu la Nyuma k'Ečila.

Paulu la Baranaba l'Ikoniyo

14 Lam'aki Paulu la Baranaba l'Ikoniyo, vo wakoto l'etemwelo k'asi Juda, ku vo wakati diui wuhu wakeyi ului a wuki w'asi Juda la asi Ngirika mbetawo. 2 Keli asi Juda, wane waki kumbetawo, wakatombosha etema w'asi wedja dia vo mpetsha anyasu. 3 Ku vo wakatshikala leko edja, wateketa la dihunga lu wulu wa Khumadiondjo, oko lakati diui dia ngandji kandi ka mamba, laketawo dia tulimbitelu la akambu wa mamba ntshama l'anya awo. 4 Keli asi usumba wakātana: amotshi lu leke l'asi Juda, akina lu leke la atumami. 5 Lam'akasangana asi wedja la asi Juda la embuledi awo, dia mbātshela kolo, la dia mbauka ave, 6 Paulu la Baranaba wakeyi dikambu diako. Ku vo wakalawo utsha la Lusteru. la Derebe, esumba wa Lukaoniya, la l'utshimba a leke lako. 7 Vo wakasambisha lukumu l'ololo leko.

Antu Wakalangi Mbadiakela Nyama la Lusteru

8 La Lusteru kaki pami kemitshi, kanga ekulu wodu, nyangu akawuti ekhusi, konkendakendaka. 9 Ndi akuki Paulu ateketa. Paulu akawendi tee. Lam'akandenyi ati: Ndi ambetawo dia nkono, 10 ndi akati la diui dia wulu ati: Emala too l'ekulu aye. Ku ndi akunela esadi, akakendakenda. 11 Lam'akenyi antu akambu wakatshi Paulu, vo wakahangohango la diui dia wulu l'oteketa wa Lukaoniya vati: Ditemolatemola diambutuhulwela lu difanelu di'antu! 12 Vo waketi Baranaba vati: Zeu; ku Paulu vati: Hereme, ne dia ndi aki oteketsi a wuki. 13 Etemwelo ka Zeu kaki l'eotwelo k'usumba. Olombedi wa Zeu akela ngombe la alembo lu asuku; ndi la antu wakalangi mbadiakela nyama yako. 14 Keli lam'akuki atumami Baranaba la Paulu dikambu diako, vo wakati ahondo awo, wakalawo l'atei w'ului w'antu, watahangohango vati: 15 Wayone, okoko wana wambunyutsha okone? Ndu shu mbeli antu, wakatungama uku nyu. Shu tambunyela lukumu l'ololo, dia nyu nkadimo uma l'akambu ane w'anyanya utsha le Unyashungu a lumu, lakatungi ulungu la kete ndu ashi a wuki la diango tshe dieli loko. 16 Lu nshi yaketi, ndi akakimo wedja tshe dia vo nkendakenda

lu mbuka yawo. 17 Keli ndi kundjatshika aha la djimbitelu, ne dia ndi akatshela ololo; akanyoloshiya mvula uma l'ulungu, la deku dia nfuldia mbu ya nde, akalutsha etema anyu la mbu ya nde la ongenongeno. 18 L'auzi aso mbakawahimbi uhimbahimba dia nshimba antu, diaha vo mbadiakela nyama.

Asi Juda Amotshi Wambetawuya Antu Dia Mbuka Paulu Ave

19 Asi Juda amotshi wakayi uma l'Atiyoka la Ikoniyo, waketawuya antu, wakuki Paulu ave, wakūtutula uma l'usumba, wakana vati: Ndi ambuvo. 20 Keli lam'akūdingi ambeki, ndi aketo, akatshu l'usumba. La wedi a pindju, ndi akatshu la Baranaba utsha la Derebe. 21 Lam'akawasambisha lukumu l'ololo l'usumba ako, ndu lam'akawete antu efula ambeki, vo wakakalula la Lusteru, l'Ikoniyo ndu l'Atiyoka. 22 Vo wakakikitsha etema w'ambeki, wakākokomiya dia ntshikala lu mbetawo, vati: L'atei w'asui, kahumbasu mboto lu diulelu dia Unyashungu. 23 Lam'akawāsonwela dikumanyi lu Ekeleziya tshe, lam'akawalombe ndu lam'akawakili mbu ya nde, vo wakātshiki le Khumadiondjo, lakawetawo.

24 Vo waketi la Pisidiya, wakakumi la Pamufuliya. 25 Lam'akawati diui la Perenga, vo wakatshu l'Ataliya. 26 Uma leko, vo wakateho utsha l'Atiyoka, lene akawakimwama lu ngandji ka mamba ka Unyashungu dia ulimu wakawashidiya. 27 Lam'akawakumi, vo wakasanganya Ekeleziya, wakāsanyia akambu tshe wakātshela Unyashungu, ndu okone akandadihwela asi wedja lukuki la mbetawo. 28 Ku vo wakatshikala la ambeki edja.

Wambutuma Paulu la Baranaba la Akina Utsha la Jerusalema

15 Antu amotshi wakayi uma la Judiya; waketsha anyasu vati: Naka hanyahema ehekali uku etshelu ka Mose, nyu hanyeyi nshimbamela. 2 Lam'akawadji la Paulu la Baranaba tamu, la mumbwana la wo embula, vo wakasonola Paulu la Baranaba la akina, dia vo ntsho la Jerusalema le atumami la dikumanyi lu dikambu diako. 3 Ekeleziya wakātshindela, waketi la Fonikiya la Samariya, wakatatelaka antu dia ekadimwelu k'etema k'asi wedja. Vo wakatamanya ngenyangenya anyawo tshe. 4 Lam'akawakumi la Jerusalema, Ekeleziya ndu atumami la dikumanyi wakālungula.

Ku vo wakāsanya akambu tshe wakâtshela Unyashungu. 5 Keli amotshi wa lu leke l'Afarise wako waketawo, wakunela, wakati vati: Eko uhumba wa mbâhemia chekeli, la mbatela dia vo nkitananya elemba a Mose.

***Wambumbwana Di'Asi
Wedja Mbahema Ehekeli***

6 Atumami la dikumanyi wasangana kame dia mumbwana dikambu diako. 7 Lam'akawambwana efula, Petero akemala, akawatela ati:

Anyasu, nyu mbeyaka nyati: Unyashungu ambutshaka esonwelo edja l'atei anyu, dia asi wedja wuki lukumu l'ololo uma l'unyo ami, wetawo. 8 Unyashungu, leya etema, akayala omenyi awo, akawasha Nyuma k'Ekila uku akandatusha. 9 Ndi kuntutshikitanya la wo, akedia etema awo dia mbetawo kawo. 10 Ya ukundi ahimbanyu Unyashungu, dia nyu mbidja lokoho lu kingu y'ambeki, laki watshesu kumbeya memba kuyanga shu? 11 Keli shu tambetawo shati: Shu tayushimbamela uma lu ngandji ka mamba ka Khumadiondjo Jesu uku vo.

Jakoba Ambuwatela Dieli Ololo Vo Ntsha

12 Antu tshe wakalembohala ki, wakahukamaka uku akataka Baranaba la Paulu, dia tulimbitelu la akambu wa mamba wakatshi Unyashungu l'atei w'asi wedja uma le wo. 13 Lam'akawalembohala, Jakoba akahula diui ati: Anyasu, nyumpukami! 14 Simeyona akasanya okone akakendela Unyashungu asi wedja ntundu, dia nsonola antu amotshi uma l'atei awo dia lukumbu landi. 15 Dikambu ne dieko pupu la aui w'amvutshi, uku ufundami ati: 16 L'okongo w'akambu aso, dimi layukalula. Dimi layuhika etumbu ka Davidi ntu, kakanyuko. Layolongosola diango diato diakalana, layukieme. 17 Ne dia antu wutshikadi, wayangi Khumadiondjo, Ndu asi wedja tshe wetama lukumbu lami, 18 Mbata Khumadiondjo, Lakalimbitshiya akambu ako umaka nshi y'edjedja. 19 Okone dimi nkanaka nti: Tathenyahenyaki asi wedja wambukadimo le Unyashungu. 20 Keli tuwafundeli dia vo nkimo ndjalanya la dikishi, munanyi, nyama yakawahini lu kingu ndu la dikila. 21 Ne dia lu nonga yaketi, Mose akayalaka la antu wakasambishaka akambu andi l'usumba la usumba. Aui andi watalemaka lu temwelo nshi y'ekila tshe.

***Wambutuma Antu Kame la Paulu la
Baranaba la Mukanda l'Atiyoka***

22 Atumami la dikumanyi ndu Ekelezia tshe wakakani vati: Ndeka ololo shu nsonola anyasu amotshi, tâtumi kame la Paulu la Baranaba utsha l'Atiyoka. Vo wakasonola Judasi, lakawetaka vati: Barasaba, la Silasi, waki antu a waki l'atei anyawo. 23 Vo wakâfundela mukanda okone vati: Atumami, dikumanyi la anyawo wambutumela anyanyu w'asi wedja weli l'Atiyoka ka la Sudiya la Kilikiya moyo. 24 Takuki vati: Amotshi wakamo uma le su, wambunyohenyahenya l'au, wambulanya etema anyu. Shu kumbatela aui aso. 25 Lam'akatadji sheki, shu takakani shati: Ndeka ololo shu nsonola apami wanyutumela kame la elangimi asu, Baranaba la Paulu, 26 antu waketawo nkimo nyumu yawo ne dia lukumbu la Khumesu Jesu Kristu. 27 Okone tambutumela Judasi la Silasi, ndu vo wayunyutela aui pupu l'enyoy. 28 Ne dia ndu Nyuma k'Ekila ndu shu takakani shati: Kema ololo shu nyukitshiya wutshu a wuki, wuleki akambu weli uhumba. 29 Nyoseke diango diakawalambula dikishi, dikila, nyama yakawahini lu kingu, la munanyi. Naka nyambuyakimela lu akambu aso, nyu nyayutsha ololo. Moyo.

***Asi Atiyoka Wambulungula
Mukanda l'Ongenongeno***

30 Lam'akawalakana la wo, vo wakatshu l'Atiyoka, wakatusanganya ului w'antu, wakawasha mukanda. 31 Lam'akawawali, vo wakangenangena, ne dia esambelu kakawâsambi. 32 Judasi la Silasi vame waki ndu amvutshi, okone vo wakalaki anyawo aui efula, wakâkikitsha. 33 Lam'akawatshikala nshi motshi leko, vo wakalakana la anyawo ki, wakakalula le wane wakâtumi. 34 Keli Silasi akakani vati: Ndeka ololo dimi ntshikali lane. 35 Ku Paulu la Baranaba wakatshikala l'Atiyoka, wetsha la wasambisha antu lukumu l'ololo la diui dia Khumadiondjo, ndu antu akina efula.

***Paulu la Baranaba
Wambudja Tamu Dia Mako***

36 Lam'aketi nshi motshi, Paulu akatela Baranaba ati: Tutshu kakiane dia ntenda anyasu l'usumba tshe wakatati diui dia Khumadiondjo, tutendi kana vo la wulu. 37 Baranaba akalangi ntsho ndu la Joani lakawetaka vati: Mako. 38 Keli Paulu akakani ati: Kema ololo shu ntsho la untu lakatutshiki lam'akisu la Pamufuliya, ndi

ETSHA WA ATUMAMI

kuntsho la su l'ulimu. 39 Tamu ta wulu takayala, ku vo wakatana: Baranaba akose Mako, akateho la ndi utsha la Kupiro; 40 ku Paulu akose Silasi, lam'akukitsha anyawo lu ngandji ka mamba ka Khumadiondjo, ndi akatshu. 41 Ndi aketi la Suriya ndu la Kilikiya, akakikitsha Ekelezia.

Paulu Ambosonola Timote

16 Paulu akakumi ndu la Derebe, ndu la Lusteru. Nyulungi, umbeki omotshi aki leko, lukumbu landi Timote, on'a usi Juda a umuntu, laketawo, keli shi aki usi Ngirika. 2 Ndi aki la lukumu l'ololo le anyasu waki la Lusteru la Ikoniyo. 3 Paulu akalangi ntsho la ndi. Ndi akawose, akawahemia uhekali, ne dia asi Juda waki lu beke diako, ndu ne dia vo tshe wakeyi vati: Shi aki usi Ngirika. 4 Lam'akawakindula lu esumba, vo wakawatela elembe wakadji atumami la dikumanyi diaki la Jerusalema, dia vo mbekitanyia. 5 Okone Ekelezia wakakikitshama lu mbetawo, wakafulanelaka la lushi la lushi.

6 Lam'akashimbi Nyuma k'Ekila Paulu la Timote mvuta diui la Asiya, vo waketi lu leke la Firungiya la Ngalatiya. 7 Lam'akawakumi lu welelo wa Musiya, vo wakayangi ntsho utsha la Bituniya, keli Nyuma ka Jesu akashimbi. 8 Ku vo waketi uma la Musiya, wakakumi la Toroa. 9 Paulu akenyi enelo l'utshu. Pami kemitshi k'usi Makedoniya akemala osengasenga ati: Yaka la Makedoniya, uyutukimanyia. 10 Lam'akandenyi enelo, kem'edja shu takayangi ntsho utsha la Makedoniya. Shu takakani shati: Unyashungu kambuteta leko dia ntasambisha lukumu l'ololo.

Paulu la Filipi; Ludiya Ambetawo

11 Lam'akatunela la watu uma la Toroa, takasimbo utsha la Samotarake. La wedi a pindju, shu takakumi la Neapoli. 12 Uma leko, shu takakumi la Filipi, usumba wuleki wuki lu leke la Makedoniya, ndu malu w'asi Romo. Shu takahangi nshi motshi loko. 13 Lushi l'ekila, shu takatumbi l'andja a lukumbu, takatshu l'umamu w'okedi, lene akatakani shati: Leko keli dihuli dia dombelo. Shu takadjase, takateketa la amantu wakasangana leko. 14 Umuntu omotshi, lukumbu landi Ludiya, usundjishi w'ahondo wa tilili, usi usumba wa Tuyatira, laki otemudi a Unyashungu, akuki aui asu. Khumadiondjo akadihula utema andi dia ndi mpukana akambu wakati Paulu.

15 Lam'akandashili mbatizama, ndi la wa lu luudu landi, ndi akatosengasenga ati: Naka nyu nkanakami nyati: Dimi leko la kolamelu le Khumadiondjo, nyuyi lakami, nyuyuhangi. Ku ndi akatetawuya.

Nyuma ka Doho Ambutumba Uma le Usekaseka a Umuntu

16 Lam'akatatshokaka utsha lu dihuli dia dombelo, shu takasangana la fumbi k'usekaseka, laki la nyuma ka doho, lakakundjiyaka akhumendi diango efula uma l'aloho andi. 17 Ndi akatuyeli, shu la Paulu, ayahangohango ati: Antu ane weko ekambi wa Unyashungu Khum'Ulungu, wambunyutela dia mbuka ka panda. 18 Ndi akatshaka osoku nshi efula. Keli Paulu akanyangi wulu, akasikiso, akatela nyuma kako ati: Dimi lambukutela lu lukumbu la Jesu Kristu nti: Utumbi uma le ndi. L'ushidi oso, nyuma kako akatumbi.

Wambokomola Paulu la Silasi, Wambuwadja lu Lukanu; Ulami a Lukanu Ambuyala Umbetawudi

19 Keli lam'akenyi akhumendi one lakawashaka wahoambutumba, vo wakandi Paulu la Silasi, wakakutula utsha la kituka lu ashu w'embuledi. 20 Lam'akawawale le embadi, vo wakati vati: Antu ane w'asi Juda wambutamanya ntombosha usumba asu. 21 Vo wambutetsha ditshelu dieli olembe dia shu nungula kana dikitanyia, shu asi Romo. 22 Ului w'antu wakakungutanela. Embadi wakati ahondo awo, wakati vati: Wakomole eshingo. 23 Lam'akawakomola ekomola efula, vo wakawadji lu lukanu. Vo wakakokomiya ulami a lukanu wulu vati: Alami ololo! 24 Lam'akanduki uku akawawutela, ndi akawadji lu luudu la l'etei, akawadji ekulu lu mbeti.

25 Keli l'asa ndeki, Paulu la Silasi wakalombaka, wakimbelaka Unyashungu esambu. Asi lukanu wakahukamaka. 26 Shashimuya, kete yakadidima wulu; ku tshina dia luudu la lukanu diakasukasuka. Kem'edja kuki tshe yakadiho. Ekodi w'untu la untu wakakeleko. 27 Ulami akemo. Lam'akandenyi kuki ya lukanu hwe, ndi akasomola yombo, akayangi ndjadiaka; akakani ati: Asi lukanu wambulawo. 28 Paulu akahangohango ati: Tuyatshelaki kolo! shu tshe teko. 29 Ndi akati ati: Nyela ewa. Ndi akoto lu luudu adidima la woma, akayakosha la ntundu ka Paulu la

Silasi. 30 Ndi akâtundja; akati ati: Wayone, kahumbami ntsha dia dimi nshimbamela? 31 Vo wakati vati: Etawo Khumadiondjo Jesu, ku we ayushimbamela, ndu wa lu luudu laye. 32 Vo wakawutela diui dia Khumadiondjo, ndi la wane waki lu luudu landi tshe. 33 Ndi akawaose l'ushidi ako w'utshu, akotsha wimbo awo w'eshingo. Kem'edja ndi akabatizama, ndu antu andi tshe. 34 Ndi akatshu la wo lakandi, akawasha ma. Ndi akangenangena efula, ndi la wa lu luudu landi tshe ne dia ndi ambetawo Unyashungu.

Embadi Wambuka Woma

35 Lam'akahuto unya, embadi wakatumi tusangema vati: Watundja antu aku. 36 Ulami a lukanu akatutela Paulu ati: Embadi wambutuma diui vati: Wanyukimo. Nyutumbi, nyutshu la ki. 37 Keli Paulu akawatela ati: Vo wakatokomola, shu asi Romo, lu ashu w'antu tshe, watatulumbuya, wakatudjisha lu lukanu. Ya ukundi ayangawo ntutundja lu usheshe? Aha osoku! Wayi vame la ndjututundja. 38 Tusangema wakututela embadi aui aso. Lam'akawuki vati: Asi Romo mbewo, vo wakuki woma. 39 Ku vo wakayi, wakâsengasenga. Lam'akawâtundja, vo wakâlombe dia ntumba uma l'usumba. 40 Lam'akawatumbi uma lu lukanu, vo wakoto lu luudu la Ludiya. Lam'akawenyi anyawo, vo wakâkikitsha etema, wakatshu.

Paulu la Silasi la Tesalonika

17 Lam'aketi Paulu la Silasi l'Apipoli la Apoloniya, vo wakakumi la Tesalonika, lene aki etemwelo k'asi Juda. 2 Paulu akoto la wo loko, uku aki etshelu kandi. Ndi akateketa la wo akambu w'uma lu afundelu nshi y'ekila shatu. 3 Ndi akâlimbitshiyawo, akati ati: Diaki la Kristu dia nsuwa, la dia ndi mbulo uma lu nyoi; Jesu one lanyutelami, ndi keli Kristu. 4 Amotshi waketawo, wakasangana la Paulu la Silasi; ndu ului a wuki w'asi Ngirika w'ololo, ndu amantu wa lukumu la wuki. 5 Keli asi Juda wakuki kandjema, wakose antu wa kolo amotshi uma l'atei w'antu k'antu, wakasanganya ului, wakatombosha usumba. Vo wakoto lu luudu la Jasona la wulu, wakayangi mbatundja le antu. 6 Lam'akiwo kumbatana, vo wakakutula Jasona la anyawo amotshi, wakâtundja la ntundu ka ewandji w'usumba. Vo wakahangohango vati: Antu ane wambungayula wa la kete tshe wambukuma

ndu lindu! 7 Keli Jasona ambâlungula. Vo tshe hawukitanyia elembe wa Kayisa, ndu watutaka vati: Khum'ekanga kekina keko, Jesu. 8 Okone vo wakahindja etema w'antu la wa ewandji w'usumba lam'akawuki akambu aso. 9 Lam'akawalungula okole uma le Jasona la akina, vo wakâkimo.

Paulu la Silasi la Beroya

10 Kem'edja anyawo wakatumi Paulu la Silasi utsha la Beroya l'utshu. Lam'akawakumi, vo wakoto l'etemwelo k'asi Juda. 11 Antu aso wakaleki wa la Tesalonika ololo, ne dia vo waketawo diui l'uhetu: wakayangiangangia la lushi la lushi lu afundelu, kana akambu ane mete kewo. 12 Ku efula waketawo, ndu amantu w'asi Ngirika akanga a lukumu, ndu apami efula. 13 Keli lam'akeyi asi Juda wa la Tesalonika vati: Paulu ambusambisha diui dia Unyashungu ndu la Beroya, vo wakatshu ndu leko. Vo wakatombosha la wakangayula antu. 14 Kem'edja anyawo wakatumi Paulu, dia ndi ntsho l'ashi a wuki. Silasi la Timote wakatshikala leko. 15 Keli atshindedi wa Paulu wakakumi la ndi pulu ndu l'Atena. Lam'akawalungula diui ati: Silasi la Timote wayi le mi esadi, vo wakatshu.

Paulu l'Atena; Daku Dia Paulu

16 Lam'akawakungaka Paulu l'Atena, utema andi akahindi efula lam'akandenyi usumba ambulula too la dikishi. 17 Lu temwelo, ndi akateketa l'asi Juda la antu w'ololo, ndu la lushi la lushi, le wane wakasangana la ndi la kituka. 18 Anangi a yimba w'asika Epikuro la w'asika Stoa amotshi wakayudja la ndi tamu. Amotshi wakati vati: Eyokayoka kene, katandi na? Akina vati: Ndi nfanaka la umvutshi a ditemolatemola di'angandangenda, ne dia ndi akâsambisha Jesu la eulwelu. 19 Vo wakukimela, wakatshu la ndi l'Areopango. Vo wakawumbula vati: Shu nkukaka mbeya wetshelu one w'uyuyu wasambishaye? 20 ne dia we ambuya la akambu amotshi w'eyuyu, wukasu. Ku shu nangaka mbeya akambu ako okone wewo. 21 Asi Atena tshe la angandangenda waki loko, kuntsha nduku dikambu dikina, paka mvuta la mbuka dikambu di'uyuyu.

22 Paulu akemala l'Areopango, akati ati: Nyu asi Atena, lu akambu tshe, dimi lambena nti: Nyu nyeko atemodi wa wulu. 23 Ne dia lam'akamatetaka, dimi lakenyi diango diatemolanyu, lakenyi ndu ediakelu

ETSHA WA ATUMAMI

kaki la efundelu kene ati: “Le Etemolatemola Kahaweyi.” Kene katemolanyu kahanyeyi, dimi layunyulimbitshiyato. 24 Unyashungu kakatungi kete la diango tshe dieli loko, ne dia ndi keli Uwandji w’ulungu la kete. Ndi hatudjaseka lu temwelo diakatshama l’anya, 25 kana anya w’antu mbukimanyia kuyanga ndi mpumbaka engo, ne dia ndame katushaka tshe lumu, luwi, la diango tshe. 26 Uma le untu otoi kakandatungi wedja tshe, dia vo mbidjase ladiku dia kete tshe. Ndi akakahanya deku diawo diakandalongosola, ndu elelu w’edjaselu kawo; 27 dia vo wayangi Unyashungu, watawamamba dia vo mbena, keli ndi kema etali uma le untu la untu. 28 Le ndi kesu la lumu. Shu tambokendakenda, tambuyala; Uku akafundi ndu afundji anyu vati: Ndu shu mbeli an’anda. 29 Ne dia shu teko ana wa Unyashungu, kema ololo shu nkana shati: Unyashungu uku paunyi mbendi, kana fesa, kana dive diakawasele lu yimba la tukanyi ta untu. 30 Unyashungu akendjula tena di’akanga a dinginya. Keli kakiane, ndi ambutela antu tshe lu ahuli tshe ati: Nyukadimuli etema. 31 Ne dia ndi akasonola lushi la numbuya wa la kete, uku elumbwelu k’ololo l’anya w’untu lakandasonola. Ndi akenya antu tshe dikambu ne, ne dia ndi akawulula uma lu nyoi.

Eyelelu ka Daku Diandi

32 Lam’akawuki dia eulwelu ka wane wakavu, amotshi wakole. Keli akina wakati vati: Katudiuki ntu. 33 Ku Paulu akamo uma la le wo. 34 Keli amotshi wakumamema, waketawo. Omotshi Diyonusiyo, usi Areopango, la umuntu lukumbu landi Damari, ndu akina kame la wo.

Paulu la Koreto; Ambusambisha l’Etemwelo

18 L’okongo w’akambu aso, Paulu akamo l’Atena, akayi la Koreto. 2 Ndi akatani usi Juda omotshi, lukumbu landi Akula, wakawuti lu leke la Poto, akayi tshinyi tshitshe uma l’Italiya, la wadendi Piriskila, ne dia Kolodiyo akadjji olembe ati: Asi Juda tshe wamo uma lu Romo. Paulu akatshu le wo. 3 Ndi akadjase la wo, ne dia vo wakatshaka wuhu wame w’ulimu. Vo wakatshaka ulimu, ne dia vo waki atshi wa mvudu y’apema. 4 Ndi akateketa lu etemwelo nshi y’ekila tshe, akayangi mbetawuya asi Juda la asi Ngririka.

Paulu Ambangana Uma le Asi Juda

5 Lam’akakumi Silasi la Timote uma

la Makedoniya, Paulu akayakimo tshe l’ulimu wa nsambisha, etsha asi Juda ati: Jesu keli Kristu. 6 Lam’akawahangakala, lam’akawotenge, ndi akanyinginya ahondo andi; akawatela ati: Dikila dianyu diayali l’ete anyu! Dimi kema la dikambu. Umaka kakiane, dimi layutsho le asi wedja. 7 Ndi akamo uma leko, akatoto lu luudu l’untu, lukumbu landi Titiyo Justo, otemodi a Unyashungu; luudu landi laki lasuki la etemwelo. 8 Kirispo, uwandji w’etemwelo, aketawo Khumadiondjo, ndu wa lu luudu landi tshe. Lam’akuki asi Koreto efula aui wa Paulu, vo waketawo, wakabatizama. 9 Khumadiondjo akatela Paulu lu enelo l’utshu ati: Tukaki woma, otekete, tolembahalaki; 10 ne dia dimi leko la ye, nduku untu layukahe lunya dia nkutshela kolo: ne dia dimi la antu efula l’usumba one. 11 Ndi akadjase leko utundu w’eleku la ngondo shamalu, aketshaka antu diui dia Unyashungu.

Wambutsho la Paulu la Ntundu ka Ngaliyo

12 Keli lam’aki Ngaliyo, umbuledi a wuki wa l’Akaya, asi Juda wakahangakaela Paulu, wakatshu la ndi la ntundu k’elumbwelu. 13 Vo wakati vati: Untu one ambetawuya antu dia ntemola Unyashungu utshikitanyi l’elembe. 14 Lam’akayangi Paulu nfula unyo, Ngaliyo akatela asi Juda ati: Nyu asi Juda, utunduyala dikambu dia kolo kana dia fumbosonyi mbedio, tshiki lutuka diui dianyu. 15 Keli naka akambu aso weko paka di’au, kumbu la elembe anyu, eko dikambu dianyu. Dimi halangi ndjala umbadi w’akambu a wuhu oso. 16 Ku ndi akawatshanya uma l’elumbwelu. 17 Ku vo tshe wakandi Sostene, umbuledi w’etemwelo, wakokomola l’elumbwelu. Keli Ngaliyo akatewala lu akambu aso tshe.

Paulu Ambutsho Utsha la Suriya

18 Paulu akatshikala leko nshi efula l’okongo wa dikambu so. Ndi akalakana la anangu, ku ndi la Piriskila la Akula wakatshu lu watu utsha la Suriya. Ndi akatanyisha divu la Kenekerea, ne dia ndi akatadjji dokoloko. 19 Vo wakayi l’Efeso, ku ndi akatshiki leko. Keli ndame akoto l’etemwelo, akateketa l’asi Juda. 20 Lam’akawolombe vati: Umudjase la su yema, ndi kumbetawo. 21 Keli ndi akalakana la wo; akawatela ati: Naka Unyashungu alanga, dimi layukalula le nyu ntu. Ndi akamo uma l’Efeso, akoto lu watu.

22 Lam'akandakumi la Kayisariya, ndi akatshu, akatasha Ekelezia moyo, ku ndi akatshu l'Atiyoka. 23 Lam'akandadjase leko yema, ndi akunela, akakindula lu leke la Ngalatiya, la Firungiya, atakikitsha etema w'ambeki tshe.

Apolo

24 Usi Juda omotshi, lukumbu landi Apolo, lakuto l'Alesanderiya, akayi l'Efeso. Ndi akesaka efula l'unyo, akeyaka afundelu ololo. 25 Untu ako aketshaka dia mbuka ka Khumadiondjo. Ndi aki la saki l'utema, akataka, aketshaka akambu wa Jesu ololo, kuyanga ndi akeyi paka batiza ka Joani. 26 Ndi akatatela mvuta diui la dihunga l'etemwelo. Keli lam'akuki Piriskila la Akula aui wakandataka, vo wakawose, wakulimbishiya mbuka ka Unyashungu ololo. 27 Lam'akandayangi ntsho l'Akaya, anyandi wakakikitsha utema andi, wakafundela ambeki dia vo mbulungula. Lam'akandakumi, ndi akaleki nkimanyia wane waketawo uma lu ngandji ka mamba, 28 ne dia ndi akakaluya asi Juda aui la wulu lu seke, awaenya lu afundelu ati: Jesu keli Kristu.

**Paulu l'Efeso; Ambeki wa Joani
Wambetawo Jesu**

19 Lam'aki Apolo la Koreto, Paulu akayi l'Efeso. Lam'akandeti lu beke di'akuna, ndi akatani ambeki amotshi leko. 2 Ndi akawambula ati: Lam'akanyetawo, nyu nyakalungula Nyuma k'Ekila? Vo wakawutela vati: Kema; shu tatuki dia Nyuma k'Ekila. 3 Ndi akawambula ntu ati: Lu na akanyambatizama? Vo wakati. vati: Lu batiza ka Joani. 4 Paulu akati ati: Joani akabatizaka antu la batiza k'ekadimwelo k'etema. Ndi akatelaka antu ati: Nyetawo one layayi l'okongo ami, Jesu ndame. 5 Lam'akawuki diui so, vo wakabatizama lu lukumbu la Khumadiondjo Jesu. 6 Lam'akawahe Paulu anyu, vo wakalungula Nyuma k'Ekila. Vo wakateketa l'eteketa ekina, wakati akambu wahatayi. 7 Vo tshe waki uku apami dikumi la ahendi.

Paulu lu Wekelu wa Turano

8 Paulu akoto l'etemwelo, akatelaka antu diui la dihunga ngondo shatu. Ndi akateketaka la wo dia mbaetawuya akambu wa diulelu dia Unyashungu. 9 Keli lam'akakikitshala amotshi, lam'akawayala la ehedia, lam'akawonyola Mbuka lu ashu w'antu, ndi akamo uma l'atei

awo, akanya ndu ambeki, akateketa la wo la lushi la lushi lu wekelu a Turano. 10 Ndi akatshaka osoku deku pendi, okone antu tshe wa l'Asiya wakuki diui dia Khumadiondjo, ndu asi Juda ndu asi Ngirika.

**Wambuleka Atundjishi w'Edienge Wulu;
Akanga w'Aloho Wambutshumba Abuku
Awo**

11 Unyashungu akatshi akambu wa mamba wuleki l'anya wa Paulu. 12 Okone vo wakatshu la tambala la ahondo waki la ndi lu dimba le akanga a hemo. Ku hemo yakashili, edienge wakutumbi. 13 Keli asi Juda amotshi, atundjishi w'edienge, waketetaka, wakahimbi mbeta lukumbu la Khumadiondjo Jesu le akanga w'edienge; wata vati: Dimi lambunyutshibela lu lukumbu la Jesu latusambishaka Paulu. 14 Ana esambeli w'usi Juda, lukumbu landi Skeva, olombedi a wuki, mbakatshaka osoku. 15 Odiengi akakaluya diui ati: Dimi mbeyaka Jesu; dimi mbeyaka Paulu, keli nyu wa na? 16 Ku kanga odiengi akawamamela, akaleki wulu vo ahendi, akalembia, ku vo wakalawo uma lu luudu lako etakabela la puta lu alimba. 17 Dikambu so diakeyama le asi Juda la asi Ngirika tshe wakadjishi l'Efeso. Vo tshe wakuki woma, ku lukumbu la Khumadiondjo Jesu lakatumwama. 18 Ndu wane waketawo ntundu, wakayi, wakashula kolo, wakati akambu wakawatshaka. 19 Akanga w'aloho efula wakasanganya abuku awo, wakatshumbi lu ashu w'antu tshe. Lam'akawali ushinga awo, vo wakedika uku tenyi dia fesa nunu akumi atanu. 20 Okone diui dia Khumadiondjo diakaleki nfula wulu.

21 L'okongo w'akambu aso, Paulu akasanganya dia mbeta la Makedoniya l'Akaya utsha la Jerusalema. Ndi akati ati: Lam'ayumuyala leko, dieli la mi dia mena ndu la Romo. 22 Lam'akandatumi wane wakukimanyia ahendi, Timote la Erasto, la Makedoniya, ndame akatshikala l'Asiya yema.

**Demetriyo la Etshudi wa Fesa
Wambotmbosha Antu**

23 Lu nshi sho, aki lundju efula, ne dia Mbuka keso. 24 Ne dia untu omotshi lukumbu landi Demetriyo, utshudi a fesa, lakatshaka tundju tufanyi la etemwelo k'Aratemi, akashaka asi ulimu ulimu efula. 25 Ndi akasanganya la wane waki la wo ulimu pupu; akawatela ati: Wayone, nyu

mbeyaka nyati: Ulimu one mbeli ongonyi asu. 26 Nyu menaka ndu nyu mbukaka nyati: Aha lane la Efeso atu, keli lasuki la Asiya tshe, untu one Paulu ambetawuya antu efula, ambâkadimula etema; ambuta ati: Ditemolatemola diakawatshi l'anya, kema ditemolatemola. 27 Aha ne dia ulimu asu utu mbayanga ndjala kolo, keli ndu ne dia etemwelo ka etemolatemola ka wuki ka umuntu Aratemi kuyanga ndjala anyanya. Wambuyanga mbunya lu lutumbu landi latôtémolaka Asiya tshe, la wa la kete tshe.

28 Lam'akawuki diui so, vo wakadanganela la kele, wakahangohango wata vati: Aratemi w'asi Efeso keli wuki! 29 Okone usumba tshe wakaluli too l'ufutunu. Lam'akawandi Ngayo la Aristarako, asi Makedoniya, atshindedi wa Paulu lu lokendo, vo wakamote l'utema otoi lu dihuli di'endelu k'akambu. 30 Lam'akayangi Paulu mboto lene aki antu ako, ambeki wakûsike. 31 Antu a waki amotshi wa l'Asiya, engenyi andi, wakûtumela diui; wakôsengasenga vati: Totoki lu dihuli diku di'endelu. 32 Wakahangohango amotshi okone, akina okone, ne dia ului tshe aki ufutunu utu. Leke l'antu lakaleki wuki, kumbeya kene kakawamote. 33 Vo wakatundja Alesandere uma l'ului w'antu, ku asi Juda wakaweme la ntundu k'antu. Alesandere akahahiya lunya, akalangi nteketa le wudja. 34 Keli lam'akaweyi vati: Usi Juda kendi, vo tshe wakahangohango pupu uku eshidi ehendi vati: Aratemi w'asi Efeso keli wuki! 35 Lam'akalembahaya ufundji a l'usumba ului w'antu, ndi akawatela ati: Nyu asi Efeso, untu akona aheyi ati: Usumba w'asi Efeso mbeli ulami w'etemwelo k'Aratemi a wuki, ndu wa dive di'ekila diakako uma l'ulungu? 36 Ne dia antu haweyi manguna dikambu ne, okone ndeka ololo nyu mbidjase ki. Tanyutshaki dikambu esadi. 37 Nyu nyakayi la apami ane lindu, waha apotodi a diango uma lu etemwelo, kuyanga atengi wa etemolatemola kasu ka umuntu. 38 Okone naka Demeteriyo la asi ulimu andi weko la untu dikambu, nshi ya numbula yeko, ndu embuledi weko. Vo watufundanaki. 39 Keli lam'ayunyuyala la dikambu dikina, wayudishidiya lu lusanganya latutusanangana uku etshelu kasu. 40 Mete, shu tambuyanga nsongwamela ne dia lundju l'elo, ne dia nduku diui diakayadi, diukukisu mvuta lu dikambu diakamotshi ului one. 41 Lam'akandashili mvuta aui aso, ndi akâdianganya.

Paulu Ambunela Uma l'Efeso, Ambutsho la Makedoniya, ndu la Ngirika

20 Lam'akashili lundju, Paulu aketi ambeki, akâkokomiya, ku ndi akalakana la wo, akunela utsha la Makedoniya. 2 Lam'akandakinula lu beke so, lam'akandâkokomiya, ndi akakumi la Ngirika. 3 Ndi akadjase leko ngondo shatu. Lam'akandalangi nteho utsha la Suriya, asi Juda wakûtshwela sheki. Lu dikambu diako, mbakandasanguya dia nkalula, la mbeta uma la Makedoniya. 4 Wane wakutshindela utsha l'Asiya, waki Sopatere, usi Beroya, on'a Purusi; Aristarako, la Sekundo, asi Tesalonika; Ngayo, usi Derebe, la Timote; Tukiko la Torofimo, asi Asiya. 5 Keli antu aso wakatatela ntsho ntundu, wakatatukunga la Toroa. 6 Lam'aketi nshi ya Ma Diaha la Edya, shu takunela uma la Filipi, takoto lu watu, lu nshi tshanu takakumi la Toroa, lene akiwo; takahangi nshi esambeli leko.

La Toroa, Paulu Ambulula Eutuko

7 Lushi la ntundu la lubingu, shu takasangana dia mbatula ma. Paulu akasanguya munela lam'ayuhuto unya, ndi akateketa la wo. Ndi akatetemala nteketa edja ndu l'asa ndeki. 8 Lu luudu la ladiku lakawasangana, aki atala efula. 9 Olongo a pami omotshi, lukumbu landi Eutuko, akadjashi lu didishi, anyingonyingo la djo ya wulu. Lam'akatetemala Paulu nteketa, djo yakawundi. Ndi akako uma lu luudu la satu la ladiku, wakôtongona ambuvo. 10 Ku Paulu akahulo, akasembemala ladiku diandi, akûkhumbatela; akati ati: Tanyudjaki lufungusu, ndi eki la lumu. 11 Lam'akandambela ntu, ndi akatula ma, akali. Ndi akateketa la wo etenyi k'utali, edja ndu lam'akahuto unya, ku ndi akunela. 12 Vo wakayi la olongo a pami la lumu, wakasalangana efula.

Paulu la Mileto

13 Shu takatatela ntsho lu watu, takateho utsha l'Asose. Shu takakani shati: Tayutakudi Paulu leko, uku akandati. Ndi akalangi mbeta uma leko l'ekulu. 14 Lam'akandatutani l'Asose, shu takawotshiya lu watu, takakumi la Mitulene. 15 Shu takunela uma leko lu watu. Lam'akahuto unya, shu takakumi lasuki la Kiyo. La wedi a pindju ntu, shu takakumi la Samose. Lomo unya, shu takakumi la Mileto. 16 Paulu akasanguya ndekana Efeso lu watu. Ndi kunanga nshisha etena l'Asiya, ne dia ndi

akasamanya dia nkuma la Jerusalema lushi la Pentekosta, naka nkukaka.

La Mileto, Paulu Ambulakana la Dikumanyi Dia Uma l'Efeso

17 Lam'aki Paulu la Mileto, ndi akatumi diui l'Efeso, aketi dikumanyi di'Ekelezia. 18 Lam'akawayi le ndi, ndi akawatela ati:

Nyame mbeyaka wuhu wakimi l'atei anyu umaka lushi lakamakamela l'Asiya, edja ndu kakiane. 19 Dimi lakatshelaka Khumadiondjo ulimu la ndjakitshakitsha, la asoi lu ashu, ndu l'ehimba wakayi le mi, ne dia tuseki t'asi Juda. 20 Dimi kumbuka woma wa nyutela akambu tshe w'ololo, lakanyetshaka l'atei w'antu, ndu lu luudu la luudu, 21 latela asi Juda ndu asi Ngirika dia nkadimula etema le Unyashungu, la dia mbetawo khumesu Jesu Kristu. 22 Nyendi, kakiane dimi lambutsho utsha la Jerusalema l'utema ukelekami: haleyi akambu wayutuyala la mi leko. 23 Tshikima Nyuma k'Ekila kamenya ati: Kanu la asui mbakukungela l'usumba la usumba. 24 Keli dimi halali lumu lami nti: Ushinga a wulu mbelo, dia nshidiya esakelu kami ka luwangu, la ulimu wakamalungula uma le Khumadiondjo Jesu, dia mvuta lukumu l'ololo la ngandji ka mamba ka Unyashungu. 25 Nyulungi, kakiane dimi mbeyaka nti: Nyu tshe wakamakinidula l'atei anyu, lanyusambisha lukumu l'ololo la diulelu dia Unyashungu, hanyuyena elundji kami ntu. 26 Okone dimi lambunyutela elo nti: Dimi laha la unungu wa dikila dianyu, nyu tshe, 27 ne dia dimi kumbuka woma wa nyutela yimba tshe ya Unyashungu. 28 Nyuyalami ololo, ndu nyulami limba, tshe ololo, wako wakanyukitsha Nyuma k'Ekila alami, dia nyu ndesha Ekelezia wa Khumadiondjo, wakandasumbi la dikila diandi. 29 Dimi mbeyaka nti: Lam'ayumutsho, ndjaundu ya pangu yayoto l'atei anyu, yayumana limba tshe. 30 Antu wayunela uma l'atei anyu nyame, wayutela antu akambu waha mete, dia nkutula ambeki l'okongo awo. 31 Okone nyewo, nyuhu lam'akimi la nyu deku satu. Dimi kunkimo dia nyokokomiya ndu l'utshu ndu la yanyi la asoi lu ashu. 32 Kakiane, dimi lambunyukimo l'anya a Unyashungu, la lu diui dia ngandji kandi ka mamba, dieya nyudia, la nyusha ukito kame la wane tshe wambukidiama. 33 Dimi konkomiya fesa ya untu, paunyi kana ahondo. 34 Nyame mbeyaka nyati: Anya ane wakankimanya, ndu wakakimanya wane waki la mi la diango diakamahumbi. 35 Dimi

lambunyena djimbitelu lu akambu tshe. Dieli la nyu dia nkamba okone dia nkimanyaia akanga a weodu, la dia nyu mbuho aui wa Khumadiondjo Jesu, wakandati ndame ati: Mbisha, ambuleka nungula otshoko.

36 Lam'akandashili mvuta osoku, ndi akakhuse adui, akalombe la wo tshe. 37 Vo tshe wakaleli wulu, wakakhumbatela Paulu lu kingu, wakanonana la ndi. 38 Vo wakaleki nyanga, ne dia diui diakandawatela ati: Hanyuyena elundji kami ntu. Vo wakutshindela lu watu.

Paulu Ambunela Ntu, Ambukuma la Tura

21 Lam'akatatshiki, shu takatshu lu watu, takasimbo utsha la Kose. La wedi a pindju, shu takakumi la Rodo, takunela uma leko utsha la Patara. 2 Lam'akatatani watu watateho utsha la Fonikiya, shu takoto loko, takatshu. 3 Lam'akatenyi Kupiro, shu takatshiki lu lunya la lomoso, takatshu utsha la Suriya, takakumi la Tura, ne dia wakalangi ntundja diango leko. 4 Shu takatani ambeki, ku taketama leko nshi esambeli. Vo wakatela Paulu uma le Nyuma, diaha ndi mbikamela la Jerusalema. 5 Lam'aketi nshi sho, shu takunela, takatshu. Vo tshe, ndu amantu ndu an'awo, wakatatshindela, edja ndu lam'akatatumbi uma l'usumba. Shu takakhuse adui l'umamu w'ashi, takalombe, takalakana. 6 Shu takoto lu watu, ku vo wakakalula.

Paulu la Kayisariya; Angabo Ambuwutela Ati: Asi Juda Wayukukeleka

7 Lam'akatashidiya lokendo lasu uma la Tura, shu takakumi la Potolemai. Shu takasha anyasu moyo; taketama la wo lushi otoi. 8 La wedi a pindju, shu takunela, takayi la Kayisariya. Shu takoto lu luudu l'usambisha Filipino, laki omotshi a l'esambeli, takahangi lakandi. 9 Untu ako aki la ana amantu anei wa dimuma, wakataka akambu wahatayi. 10 Lam'akatahanga leko nshi motshi, umvutshi omotshi, lukumbu landi Angabo, akayi uma la Judiya. 11 Lam'akandayi le su, ndi akose uya wa Paulu, akayakelekawo l'ekulu ndu l'anya. Ndi akati ati: Nyuma k'Ekila kata ati: Asi Juda wa la Jerusalema wayukukeleka kanga uya one wuhu one, wayukimo l'anya w'asi wedja. 12 Lam'akatuki akambu aso, shu la akanga a dihuli diako takasengasenga Paulu diaha ndi ntsho la Jerusalema. 13 Paulu akakaluya diui ati: Ukundi atshanyu okone, walelanyu, wambatanyu asulu? Dimi

ETSHA WA ATUMAMI

hayalongosola dia ntukelekama tshu, keli ndu dia dimi ntuvo la Jerusalema lu lukumbu la Khumadiondjo Jesu. 14 Lam'akandaseke mbetawo, shu takalembohala; takati shati: Lulangu la Khumadiondjo latshami!

Paulu Ambunela Uma la Kayisariya Utsha la Jerusalema

15 L'okongo a nshi sho, shu takalongosola diango diasu, takatshu utsha la Jerusalema. 16 Ambeki amotshi w'uma la Kayisariya wakatshu la su, wakayi la usi Kupiro, lukumbu landi Manasona, umbeki w'edjedja, dia shu ntuhanga lakandi.

Paulu la Jerusalema

17 Lam'akatakumi la Jerusalema, anyasu wakatulungula la ongenongeno. 18 La wedi a pindju, Paulu akatshu la su le Jakoba. Dikumanyi tshe diaki laawo. 19 Lam'akandashili mbasha moyo, ndi akāsanyia akambu tshe wakūtshela Unyashungu l'ulimu andi l'atei w'asi wedja. 20 Lam'akawuki dikambu so, vo wakatumbula Unyashungu. Vo wakawutela vati: Unyasu, we ambena asi Juda nunu efula waketawo. Vo tshe weko la saki k'elembe. 21 Vo wambuka vati: We atetshaka asi Juda tshe wa l'atei w'asi wedja dia nseka Mose; ambuwatela vati: Tanyāhemiaki an'anyu ehekeli. Tanyuyelaki ditshelu dia ntundu. 22 Katshasu na? mete vo wayusangana lam'ayuwuka vati: We ambuya. 23 Okone utshi uku ayangasu nkutela. Shu teko la apami anei weli la dokoloko. 24 Uwaose, uyaedia la wo, uwafuteli, keli wanya divu l'ete awo. Okone antu tshe wayeya vati: Lukumu laye lakawuki, laha mete. Ku vo wayeya vati: We atusimboka, atukitanyiaka elembe. 25 Keli ne dia asi wedja waketawo, takātumela mukanda. Shu takawatela shati: Nyukili diango dia diakelawo dikishi, nyukili ndu dikila, la nyama yakawahini lu kingu, la munanyi. 26 Ku Paulu akose apami ako. La wedi a pindju, ndi akayedia kame la wo, akoto lu etemwelo, akatela embadi dia ekukelu ka nshi ya ndjaedia. Ndi akatshikala edja ndu untu l'untu akashidiya elambu wakawakimoka le Unyashungu.

Asi Juda Wambunda Paulu lu Etemwelo; Olombodi w'Alimbi Ambuwamela

27 Lam'akayangi nshi esambeli nshila, asi Juda w'uma l'Asiya, lam'akawenyi Paulu l'etemwelo, wakatombosha ului w'antu, ku vo wakawundi. 28 Vo wakahangohango

vati: Apami w'asi Isariyele, nyutukimanyia! Nd'one latetshaka antu tshe lu ahuli tshe. Ndi atonyolaka wudja asu, la elembe ndu dihuli ne. Ndi akayi la asi Ngirika lu etemwelo, ambulanya dihuli ne di'ekila ladiku di'akambu aso, 29 ne dia vo wakatawenyi la Torofimo, usi Efeso, l'usumba, ku wakakani vati: Paulu akawotshiya lu etemwelo. 30 Lundju lakayala l'usumba w'utundu, antu wakamote. Vo wakandi Paulu, wakūtutula uma l'etemwelo; kem'edja, kuki yakadihama. 31 Lam'akawayangi mbudiaka, lundju laki l'usumba w'utundu wa Jerusalema lakukema le olombodi w'alimbi. 32 Kem'edja, ndi akose alimbi la alami, akatshu le wo esadi. Lam'akawenyi olombodi la alimbi vo wakakimo nkomola Paulu. 33 Ku olombodi akasukana, akawundi. Ndi akati dia vo mbukeleka la molola ehendi. Ndi akambula ati: One na? Utshindi na? 34 L'atei w'ului w'antu, amotshi wakahangohango wuhu one, akina wuhu one. Lam'akindi kumbeya dikambu ololo ne dia lundju, ndi akati dia vo mbēla lu luudu l'alimbi. 35 Lam'akandakumi lu kibandelu, alimbi wakawembe ne dia ngala k'antu, 36 ne dia ului w'antu wakayyakaka l'okongo, wayahangohango vati: Wūdiaki!

37 Lam'akawayangi mboto la Paulu lu luudu l'alimbi, ndi akambula olombodi ati: Dimi la wulu wa nkutela diui? Olombodi akawumbula ati: We mbeyaka oteketa w'asi Ngirika? 38 Aha usi Edjibitu keye, lakatombosha antu ntundu, ndu lakatshu l'antu nunu nei, wetawo vati: Atomboki, l'usui? 39 Paulu akati ati: Usi Juda kemi, usi Taraso ka la Kilikiya, laha usi usumba w'anyanya. Dimi lambukosengasenga nti: Mvuteli antu ane diui. 40 Lam'akandetawo, Paulu akemala lu kibandelu, akahahiya antu lunya. Lam'akawalembobohala tshe, ndi akawatela l'oteketa w'asi Heberu ati:

22 Analingu la wapapa, nyuki aui ami, walangami nyutela kakiane!

Paulu Ambutela Antu Okone Akandakadimula Utema

2 Lam'akawuki Paulu awatela l'oteketa w'asi Heberu, vo wakaleki nembohala. Ku ndi akati ati:

3 Usi Juda kemi, lakuto la Taraso ka la Kilikiya. Dimi lakuli l'usumba one l'ekulu wa Ngamaliyeli; wakambetsha elembe a watsheshe wulu. Dimi laki la saki lu dikambu dia Unyashungu, uku wenyu la to, nyu tshe elo. 4 Dimi lakasuya antu wa lu Mbuka kene

pulu ndu lu nyoi. Dimi lakakeleka apami la amantu, lakawadji lu kanu. 5 Ndu olombedi a ladiku eko omenyi, ndu dikumanyi tshe. Dimi lakalungula mikanda uma le wo utsha le anyasu, lakatshu utsha la Damaseke dia mbela ndu waku waki leko l'ekodi uya la Jerusalema, dia ndjasuya.

6 Lam'akamatatshokaka osoku, lam'akamakumi lasuki la Damaseke, unya aki l'atei w'ote; usasi a wulu uma l'ulungu akampetela shashimuya. 7 Dimi lakako la kete, lakuki diui diamvutela ati: Saulu, Saulu, ukundi ansuyaye na? 8 Dimi lakûkaluya diui nti: Khumadiondjo, we na? Ndi akamvutela ati: Dimi Jesu y'usi Nazareta kasuyaye. 9 Wane waki la mi, wakenyi usasi mete, keli vo kumbuka diui dia one lakateketaka la mi. 10 Dimi lakawumbula nti: Khumadiondjo, kayumutsha na? Khumadiondjo akamvutela ati: Unela, utshu utsha la Damaseke. Vo wayukutela akambu tshe leko, wakawakosonwela dia we ntsha. 11 Dimi kumbeya mena ne dia usasi ako a wulu. Wane waki la mi, wakanombola la lunya. Okone dimi lakakumi la Damaseke.

12 Pami kemotshi aki leko, lukumbu landi Ananiya, lakakitanyiaka elembe, laki la lukumu l'ololo l'atei w'asi Juda tshe waki leko. 13 Ndi akayi le mi, akemala lasuki la mi; akamvutela ati: Onalingu Saulu, svena. Ku l'ushidi ako, dimi lakasene, lakawenyi. 14 Ndi akati ati: Unyashungu a watshe su kambukosonola, dia we mbeya lulangu landi, la dia we mena One l'Ololo, la dia we mbuka diui uma l'unyo andi. 15 We ayenya antu tshe akambu wakayenyi la wakayuki. 16 Akayakungi na? Unela, ubatizami, uyaotsha kolo yaye, eti lukumbu la Khumadiondjo.

17 Lam'akamakalula la Jerusalema, lam'akamolombaka l'etemwelo, dimi lakako la yimbatshimba. 18 Dimi lakawenyi amvutela ati: Usamanya, umo esadi uma la Jerusalema, ne dia vo hawetawo diui diamvutaye. 19 Dimi lakati nti: Khumadiondjo, vame mbeyaka okone akamadjaka waku waketawoka lu kanu, la okone akamâkomolaka lu temwelo tshe. 20 Lam'akawadiaki Stefano, undakanyi a dikambu diaye, dimi lakemala lasuki, laketawo dikambu diako; lakalami ahondo a wane wakûdiaki. 21 Ndi akamvutela ati: Umo. Dimi layukutuma etali le asi wedja.

**Antu Wambuhangohango
Dia Ndjaka Paulo**

22 Vo wakûhukama edja ndu lu diui

so, ku wakahangohango vati: Nyunya untu one la kete! Kema ololo ndi ndjala la lumu. 23 Vo wakahangohango, wakakulula ahondo awo; wakafumbula ditshu l'ulungu. 24 Lam'akawatshi osoku, olombodi a wuki w'alimbi akati dia vo ndja la ndi lu luudu l'alimbi, la dia mbokomola eshingo, dia ndi mbeya okone wakawahangohangoki lu dikambu diandi. 25 Lam'akawûkeleka ekodi, Paulu akambula olombodi w'alimbi, lakemadi lasuki la ndi, ati: Nyu la wulu wa nkomola untu leli usi Romo eshingo, la ntundu watawamia? 26 Lam'akuki olombodi w'alimbi diui diako, ne dia akatshu le olombodi a wuki w'alimbi; akawutela ati: Ayangaye ntsha na? ne dia untu one eko usi Romo. 27 Olombodi a wuki akayi, akawumbula ati: Umvuteli, usi Romo keye? Ndi akati ati: Elu. 28 Olombodi a wuki akakaluya diui ati: Dimi lakasumbi wulu wa ndjala usi Romo la falanga efula. Paulu akawutela ati: Dimi leko usi Romo umaka eutwelu. 29 Kem'edja, wane wakalangi mbumbula, wakûtshiki. Ndu olombodi a wuki aki la woma lam'akandeyi ati: Usi Romo kendi, ne dia ndi akûkeleka.

**Paulu Ambuhanda Ne
Dia Usi Romo Kendi**

30 La wedi a pindju, olombodi a wuki w'alimbi akalangi nshihudia dikambu diakôsongwela asi Juda, akûkelekula. Ndi akati dia olombedi a waki la embadi tshe nsangana. Ndi akayi la Paulu, akaweme la ntundu kawo.

Paulu la Ntundu k'Embadi

23 Paulu akendi embadi tee, akati ati: Anyasu, dimi lakayala la khum'utema k'ololo lu ashu wa Unyashungu edja ndu elo. 2 Ananiya, olombedi a ladiku, akatela wane wakemala lasuki la ndi dia vo mbôkomola l'unyo. 3 Ku Paulu akawutela ati: We eheli kukitami pembe, Unyashungu ayukokomola! We ambudjase ne dia numbuyami uku elembe, keli ukundi awatelaye dia vo nkomolami, aha uku elembe? 4 Wane wakemadi lasuki, wakawumbula vati: We ambotenga olombedi a ladiku wa Unyashungu? 5 Paulu akati ati: Anyasu, dimi kumbeya nti: Olombedi a ladiku mbendi; ne dia ambufundama ati: Toteketaki diui dia kolo lu dikambu dia umbuledi a wudja aye.

6 Keli lam'akeyi Paulu ati: Amotshi waki Asaduke, la akina waki Afarise, ndi akahangohango l'elumbwelu ati: Anyasu, dimi leli Ufarise, on'a Afarise, ne dia

ETSHA WA ATUMAMI

elungamelu la eulwelu k'uma lu nyoi mbanumbuyanyu. 7 Lam'akandati osoku, tamu takayala l'asa Afarise la Asaduke. Ului akatana. 8 Ne dia Asaduke watutaka vati: Kema eulwelu, kema ondjelo kuyanga edimu. Keli Afarise watetawoka akambu ako ahendi. 9 Lundju efula lakayala. Afundji amotshi wa lu leke l'Afarise wakemala, wakadji tamu vati: Shu hatenyi untu one la dikambu dia kolo. Naka edimu kama ondjelo akateketa la ndi, ku ngandi? 10 Lam'akayala lundju efula osoku, olombodi a wuki w'alimbi akuki woma, ati: Wayatshatsha Paulu. Ndi akatela alimbi dia vo ntsho, la ntuwunya uma l'atei awo, la dia vo ndja la ndi lu luudu l'alimbi.

11 Khumadiondjo akemala lasuki la ndi l'utshu, akati ati: Ongenengene. Uku akayati dikambu diami la Jerusalema, okone dieli la ye dia dita ndu la Romo.

"Hatuli, Hatono, Tshikima Tambudiaka Paulu"

12 Lam'akahuto unya, asi Juda wakasangana, wakasangani lulimi; wakatshiki etunyi vati: Shu hatuli, hatono, tshikima tambudiaka Paulu. 13 Wakaleki akumi anei, mbakasangi lulimi osoku. 14 Vo wakayi le elombedi a waki la dikumanyi, wakati vati: Tambusanga lulimi lasu; tambutshika etunyi wulu shati: Hatunganela engo, tshikima tambudiaka Paulu. 15 Kakiane nyu la embadi, nyuteli olombodi a wuki w'alimbi dia ndi ndja la ndi le nyu, uku wane wayanga mumbula dikambu okoke. La ntundu ndi atayi lasuki, shu tayuyalongosola dia mbudiaka.

On'a Kadiya Paulu Ambushula Sheki ya Ndjaka Paulu

16 Keli on'a kadiya Paulu akuki dikambu di'ehulamelu kawo, akayoto lu luudu l'alimbi, akatela Paulu. 17 Paulu aketi olombodi omotshi w'alimbi, akawutela ati: Tshoka la olongo one le olombodi a wuki, ne dia ndi la diui dia mbutela. 18 Ku ndi akawose, akayi la ndi le olombodi a wuki w'alimbi; akawutela ati: Paulu, usi lukanu, kumbetshi. Ndi konombi dia ndja la olongo one le ye; ndi la diui dia mbutela. 19 Olombodi a wuki akûkimela lu lunya, akatshu la ndi sheki. Ndi akawumbula lu usheshe ati: Diui diakona diayangaye mvutelami? 20 Ndi akati ati: Asi Juda wambusanga lulimi dia nkolomba dia we ndja la Paulu lui

l'elumbwelu, uku wati: Mbumbuli dikambu diandi okoke ntu. 21 Okone tetawoki diui diawo. Ne dia apami wuleki akumi anei wa l'ului awo wambûhulamela, wakasangani lulimi; wakatshiki etunyi vati: Hatuli, hatono, tshikima tambûdiaka. Kakiane vo wambuyalongosola, wambukunga diui uma le ye. 22 Ku olombodi a wuki akatumi olongo ako, akôkokomiya ati: Tutelaki nduku untu akambu aso wumvutediye.

Wambulawuya Paulu Utsha la Kayisariya

23 Ku olombodi a wuki w'alimbi aketi olombodi ehendi, akawatela ati: Nyolonge alimbi kama hyendi dia ntsho la Kayisariya, ndu alimbi watahemaka lu falasa akumi esambeli, la akanga w'akonga kama hyendi, kawuneli l'utshu one l'eshidi divwa. 24 Ndi akawatela ndu dia mbosa falasa ya mbahemia Paulu, la dia mbukumia ololo le umbuledi Felika. 25 Ndi akafundi mukanda ati:

Mukanda wa Kolodiyo Lusiya le Felika

26 Kolodiyo Lusiya ambutumela shakasaka, umbuledi Felika, moyo. 27 Asi Juda wakandi pami kene, wakayangi mbudiaka. Keli dimi lakayi le wo la alimbi, lakûshimbela lam'akameyi nti: Usi Romo kendi. 28 Ne dia lakalangi mbeya dikambu diakawôsongwela, lakayi la ndi l'elumbwelu kawo. 29 Dimi lakûtani wakôsongwela dia akambu w'elembe awo, keli aha la dikambu dia ndi mvo, kana dia mbidjama lu lukanu. 30 Lam'akameyi nti: Wambutshwela pami kene sheki, diako mbamumutuma le ye esadi. Dimi lakatela asongwedi andi dia vo ndja la ndjôsongwela la ntundu kaye.

Wambulama Paulu lu Luudu la Herode

31 Okone alimbi wakose Paulu, uku akawawatela, wakatshu la ndi l'utshu utsha l'Atipatiri. 32 Keli la wedi a pindju, vo wakatshiki wane waki lu falasa dia ntsho la ndi, wakakalula lu luudu l'alimbi. 33 Lam'akawakumi la ndi la Kayisariya, vo wakasha umbuledi mukanda, wakeme Paulu la ntundu kandi. 34 Lam'akandali mukanda, ndi akambula leke landi. Lam'akandeyi ati: Uma lu leke la Kilikiya kendi, 35 ndi akawutela ati: Dimi layuka dikambu diaye ololo lam'ayuya asongwedi aye. Ndi akati dia vo mbulama lu luudu la wuki la Herode.

*Wambeta Paulu;
Teretulo Ambosongwela*

24 Lam'aketi nshi tshanu, olombedi a ladiku Ananiya akayi la dikumanyi dimotshi, ndu la otekotshi, lukumbu landi Teretulo. Vo wakasongwela Paulu le umbuledi. 2 Lam'akaweti Paulu, Teretulo akatatela mbosongwela ati:

Shu la ongenongeno ne dia ki keli la su uma le ye, we shakasaka Felika, ne dia akambu wa kolo a wudja one wambuluwana uma l'ewu kaye. 3 Shu tambetawo dikambu ne lu wehu tshe ndu ahuli tshe; tambukuka lusaka otekoya. 4 Ne dia halangi nkuhekuya la aui efula, dimi la mbukosengasenga dia we mbetawo ntukela aui tshitshe. 5 Ne dia takatani pami kene, kanga ngala, ambotombosha asi Juda tshe wa lu kete tshe; ndi keli dihuka dia leke l'asi Nazareta. 6 Dikambu dikina, ndi akahimbi nsuwula etemwelo, ku shu takawundi, takayangi mbulumbuya uku elembe asu. 7 Keli olombodi a wuki w'alimbi, Lusiya akayi, akatohotolandi la wulu, 8 akatela wane wakôsongwela, dia vo ndja la ntundu kaye. Lam'ayuyuwumbula, we ayeya akambu tshe wakatôsongwela.

9 Ndu asi Juda wakôsongwela, wakati vati: Akambu aso mete kewo.

Paulu Ambuyateketela

10 Umbuledi akenya Paulu la luna ati: Utaka. Ku Paulu akati ati:

Dimi mbeyaka nti: We aya umbadi a wudja one deku efula, dimi layuyateketela l'ongenongeno. 11 Dieli la ye dia mbeya wati: Nshi yakamatshu la Jerusalema dia ntotemola Unyashungu, kundeka dikumi la hyendi. 12 Vo kuntanami ladja l'untu tamu, kana latombosha ului w'antu lu etemwelo, kuyanga lu temwelo, kuyanga l'usumba. 13 Vo haweyi nshikike akambu wansongwelawo kakiane. 14 Keli dimi lambukushwela dikambu ne nti: Dimi latotemolaka Unyashungu a watshesu lu yediko ya Mbuka, ketawo vati: Otemwelo. Latetawoka akambu tshe weli lu elembe, ndu wakafundi amvutshi. 15 Dimi lambulungamela Unyashungu, uku ambulungamela antu ane vati: Eulwelu k'antu w'ololo la antu wa kolo uma lu nyoi kayuyala. 16 Dimi lambuyasutshasutsha nshi tshe dia ndjala la khum'utema k'ololo le Unyashungu ndu le antu. 17 Lam'aketi deku dimotshi, dimi lakayi la diango dia ketshi dia mbisha wudja asu, la dia ndjulumbula

ulambu. 18 Lam'akamatshaka osoku, asi Juda wakantani lu etemwelo lakashidi mbediama; dimi taki l'ului w'antu, kuyanga la lundju. Keli asi Juda amotshi w'uma l'Asiya waki leko - 19 diaki la antu aso dia ndja le ye, dia nsongwelami, naka vo la mi dikambu. 20 Naka aha osoku, antu aso wati dikambu dia kolo, diakawantani la dio lam'akamemala la ntundu k'embadi. 21 Paka diui diame mbakamahangohango lam'akamemala l'atei awo nti: Wambunumbuya lu ashu anyu elo dia eulwelu ka wavo.

Felika Ambûtshika lu Lukanu

22 Keli Felika, lakaleki mbeya dikambu dia Mbuka keku, akâkungia ati: Lam'ayuya olombodi a wuki w'alimbi Lusiya, dimi layusambula dikambu dianyu. 23 Ndi akatela olombodi dia mbulama, keli aha mbusha ulimu kuyanga nshimba engenye andi mbûkimanya.

24 Lam'aketi nshi motshi, Felika akayi la wadendi Dusila, laki usi Juda, aketi Paulu dia vo mbuka dia mbetawo kandi le Kristu Jesu. 25 Lam'akandataka ne dia akambu w'ololo, la ndjakimela, la elumbwelu kayayi, Felika akuki woma. Ndi akati ati: Tukutsho. Lam'ayumutana etena k'ololo, dimi layuketa. 26 Ndi akalungamela ati: Paulu ayumbisha falanga. Dia dikambu so, mbakandawetaka tena la tena dia nsawula la ndi. 27 Keli lam'aketi deku pendi, Porokiyo Festo akakiti Felika. Felika akatshiki Paulu lu lukanu, ne dia ndi akalangi nemiana le asi Juda.

Paulu la Ntundu ka Festo

25 Lam'akakumi Festo lu leke landi la kete, l'okongo a nshi shatu, ndi akunela uma la Kayisariya, akatshu utsha la Jerusalema. 2 Elombedi a waki la antu a waki w'asi Juda wakasongwela Paulu le ndi. Vo wakôsengasenga, 3 wakôlombe dia ndi mbatshela ololo dia ntuma Paulu uya la Jerusalema. Vo wakasanguya ntûhulamela lu mbuka dia mbûdiaka. 4 Keli Festo akakaluya diui ati: Paulu ayulamema la Kayisariya ndu ati: Dime lutsha ntsho leko. 5 Wane weli la wulu l'atei anyu, kawutshu la mi. Naka pami kene eko la munga, kawutôsongwele.

Paulu Ambukungela Kayisa

6 Lam'akadjase Festo l'atei awo, kumbeta nshi enanei kana dikumi, ndi akatshu utsha la Kayisariya. La wedi a pindju, ndi akadjase l'elumbwelu, akati dia vo ndja la Paulu. 7 Lam'akandayi, asi

ETSHA WA ATUMAMI

Juda waki uma la Jerusalema wakemala wûdingi, wakôsongwela akambu wa wulu efula, wakiwo kumbeya nshikike. 8 Paulu akayangunela ati: Dimi komonyola elembe w'asi Juda, kuyanga etemwelo, kuyanga Kayisa. 9 Keli Festo akalangi nduwana le asi Juda, akakaluya Paulu diui ati: We ayetawo ntsho la Jerusalema dia ntulumbuyama akambu ane lu ashu ami? 10 Keli Paulu akati ati: Dimi lambemala la ntundu k'elumbwelu ka Kayisa, dihuli diahimbami numbuyama. Dimi kuntshela asi Juda kolo, weme mbeyaka dikambu so. 11 Naka utshi wa kolo mbemi, naka lakatshi dikambu diukukimi mvo, dimi halaseke mvo. Keli lam'ayuyala akambu ane wansongwelawo waha mete, untu heyi nkimomi le wo ne dia mbangenyanganya. Dimi lambukungela Kayisa. 12 Festo akambwana la embadi; akawutela ati: We ambukungela elumbwelu ka Kayisa; we ayutsho le Kayisa.

Festo Ambutela Angiripa Dikambu Dia Paulu

13 Lam'aketi nshi motshi, khum'ekanga Angiripa la Berenika wakayi la Kayisariya, dia ndjemula Festo. 14 Lam'akawayala leko nshi efula, Festo akatela khum'ekanga dikambu dia Paulu ati: Untu omotshi eko lindu, lakatshiki Felika. 15 Lam'akimi la Jerusalema, elombedi a waki la dikumanyi di'asi Juda wakamvutela dikambu diandi, wakanombe dia dimi mbâmia. 16 Dimi lakâkaluya diui nti: Asi Romo kema la etshelu ka nkimo untu ntundu one losongwediwo atayala la ntundu ka wane wôsongwedi, ndu atayateketela dikambu diakawosongwela. 17 Lam'akawasangana lindu, dimi kuntshibatshimba. Keli la wedi a pindju, dimi lakadjase l'elumbwelu, lakati dia pami kako ndja. 18 Lam'akemala wane wakôsongwela, vo kumbosongwela akambu wa kolo uku akamakanaka. 19 Keli vo wakambwana di'akambu w'otemwelo awo, la dia untu omotshi Jesu lakavu; keli Paulu mvutaka ati: Ndi eko la lumu. 20 Dimi lakakanana lama nsambula akambu ako. Lakawumbula nti: We ayetawo ntsho la Jerusalema la ntulumbuyama akambu ane leko? 21 Keli Paulu akalangi dikambu diandi nsambwama paka le khum'ekanga ka wuki Angusta. Ku dimi lakati nti: Wûtshunge, edja ndu lam'ayumûtuma le Kayisa. 22 Angiripa akatela Festo ati: Ndu dimi nangaka mbuka diui dia untu oso. Festo akati ati: We ayuka diui diandi lui.

23 La wedi a pindju, Angiripa la Berenika wakayi eyelu ka lukumu. Vo wakoto l'elumbwelu kame la elombodi a waki w'alimbi ndu la dihangamendi dia l'usumba. Festo akati diui, ku wakayi la Paulu. 24 Festo akati ati: Khum'ekanga Angiripa, la apami tshe weli la su lone, nyu menaka untu one, asi Juda tshe wakôsongwela la ntundu kami la Jerusalema ndu lindu. Vo wakati vati: Kema ololo ndi ntshikila la lumu ntu. 25 Keli dimi kumbutana la dikambu dia ndi mvo. Lam'akandakungela elumbwelu ka khum'ekanga ka wuki Angusta, dimi lakasanguya dia mbutuma le ndi. 26 Dimi kema la diui dia shikaa dia nfundela khumemi dikambu diandi. Dia dikambu ne mbuyemi la ndi la ntundu kanyu, ndjekaleka la ntundu ka khum'ekanga Angiripa. Lam'aytmdûlumbuya, dimi layuyala la diui dia nfunda. 27 Ne dia lambukana nti: Kema ololo ntuma usi lukanu, ku aha mvuta akambu wakawôsongwela.

Paulu Ambuyateketela la Ntundu k'Angiripa

26 Angiripa akatela Paulu ati: We la wulu wa mvuta dikambu diaye. Ku Paulu akahahiya lunya, akayateketela ati :

2 Khum'ekanga Angiripa, dimi la ongenogeno elo dia ndjateketela la ntundu kaye, di'akambu tshe wakansongwela asi Juda. 3 Dimi lambongenangena utamanya, ne dia we mbeyaka ditshelu diawo la tamu tawo ololo. Okone lambukosengasenga dia we mpukama diui diami okoke.

4 Asi Juda tshe mbeyaka ditshelu diami umaka dikenda, diaki la mi uma l'etatelu l'atei a wudja asu, ndu la Jerusalema. 5 Lam'alangawo mvuta diui, vo wambumbeyaka edja vati: Ufarise mbendi, lakaleki ndjela akambu w'otemwelo asu wulu. 6 Kakiane, dimi lambemala lane dia numbuyama ne dia elungamelu ka daka diakalaki Unyashungu tshesu. 7 Wedja asu dikumi la ehendi watukambelaka Unyashungu ulimu wulu ndu l'utshu ndu la yanyi. Vo watulungamelaka vati: Tayulungula daka diako. Khum'ekanga, asi Juda wambonsongwela ne dia elungamelu kene! 8 Ukundi akananyu nyati: Dio dieko dikambu diaheyana mbetawoma ati: Unyashungu atululaka wane wakavu?

9 Mete, ndu dimi lakakani nti: Dieli la mi dia ntshela lukumbu la Jesu y'usi Nazareta akambu wa kolo efula. 10 Dimi lakatshaka okone ndu la Jerusalema.

Lam'akamalungula wulu uma le elombedi a waki, dimi lakadji ekilami efula lu mvudu ya kanu. Lam'akawayangaka mbadiaka, dimi laketawoka. 11 Tena efula mbakamasuyaka lu temwelo tshe. Dimi lakahimbi dia mbatengia Unyashungu, lakatamanya mbahetsha, lakasuya edja ndu l'esumba wa lu wedja ekina.

12 Okone dimi lakatatshokaka utsha la Damaseke lu dikambu ne, la wulu uma le elombedi a waki la diui diawo. 13 Lam'akakumi unya l'atei ote, we khum'ekanga, dimi lakenyi usasi w'ulungu, wuleki usasi a unya. Vo wakampetela dimi la wane wakatatshokaka la mi. 14 Shu tshe takako la kete. Ku dimi lakuki diui diamvutela l'oteketa w'asi Heberu ati: Saulu! Saulu! ukundi ansuyaye na? We ayuhumo dia nsukuya lukulu l'etamba wa sodi. 15 Dimi lakati nti: Khumadondjo, we na? Ndi akati ati: Dimi Jesu, kasuyaye. 16 Keli unela, emali. Dimi lambenama le ye, dia nkosonola uku ukambi la omenyi w'akambu wakayamenyi, ndu wayumukenyi. 17 Dimi layukushimbela uma le asikaye, ndu uma le asi wedja - wakutumami le wo; 18 dia we nsenya ashu awo, dia vo nkadimo uma lu udjima utsha lu usasi, la uma lu wulu a Satana utsha le Unyashungu; dia vo nungula edimanyelu ka kolo la ukito l'atei a wane wambukidiama uma lu mbetawo ka dikambu diani.

19 Uma lu akambu aso, we khum'ekanga Angiripa, mbakimi kuntuna nkitanyia enelo k'uma l'ulungu. 20 Ntundu, dimi lakatela wa la Damaseke, ndu wa la Jerusalema, ndu wa lu leke la Judiya tshe, ndu asi wedja nti: Nyukadimuli etema le Unyashungu. Nyutshaki akambu uku ukadimudinyu etema. 21 Dia dikambu ne, mbakamundi asi Juda lu etemwelo, wakayangi ndjakami. 22 Ne dia Unyashungu akankimanyia, mbemadimi edja ndu elo, latela wa tshitshe ndu wa waki paka akambu wakati amvutshi la Mose vati: Wayuya. 23 Diaki la Kristu dia nsuwa, ku ndi akulo uma lu nyoi. Okone ndi akenya ndu asikandi ndu asi wedja yanyi.

***Festo Ambutela Paulu Ati:
"We Ambudjo"***

24 Lam'akandayateketela osoku, Festo akati diui dia wulu ati: Paulu, we ambudjo! Ewu kaye k'utamanya kambukudjuya. 25 Keli Paulu akati ati: Shakasaka Festo, dimi kema umbidjoki. Dimi lambuta aui wa mete la yimba. 26 Khum'ekanga mbeyaka

akambu aso, haluki woma dia mbutelawo. Lambukana nti: Akambu ako hawuwushama, ne dia dikambu ne kuntshama lu usheshe. 27 Khum'ekanga Angiripa, we mbetawoka aui w'amvutshi? Dimi mbeyaka nti: We mbetawoka. 28 Angiripa akatela Paulu ati: L'etena ka tshitshe, we nkanaka dia mbetemi usika Kristu! 29 Paulu akati ati: Kana etena ka tshitshe kana k'utali, dimi lambolomba Unyashungu dia we la wane tshe wambuka aui ami elo, wayali uku dimi, paka molola ene etu watshikali.

***Utunduyala Paulu Kunkungela
Kayisa, Tshiki Ndi Ambukimwama***

30 Khum'ekanga akunela, ndu umbuledi, ndu Berenika, ndu wane wakadjashi kame la wo. 31 Lam'akawamo, vo wakatanela vati: Untu one kuntsha dikambu dia ndi mvo, kuyanga dia mundama lu lukanu. 32 Angiripa akatela Festo ati: Utunduyala untu one kunkungela elumbwelu ka Kayisa, tshiki ndi ambukimwama.

Paulu Ambutsho lu Watu Utsha l'Italiya

27 Lam'akawasanguya dia shu ntsho lu watu utsha l'Italiya, vo wakakimo Paulu la asi lukanu amotshi le Juliyo, olombodi w'alimbi wakawetaka vati: Ului w'Angusta. 2 Lam'akatoto lu watu wa l'Adaramutiyo, wakatatshokaka lu ahuli waki l'umamu w'ashi lu leke l'Asiya, shu takatshu, ndu la Aristarako, usi Makedoniya, uma la Tesalonika. 3 La wedi a pindju, shu takakumi la Sidona. Juliyo akatshela Paulu la ketshi, akawusha wulu wa ndi ntsho la ntenda engenyi andi, dia ntukimanyama le wo. 4 Lam'akatamo uma leko, shu taketi l'okongo a Kupiro, ne dia lopepe lakatukaluyaka. 5 Lam'akatateho ashi waki lasuki la Kilikiya la Pamufuliya, shu takakumi la Mura ka la Lukiya. 6 Olombodi w'alimbi akatani watu wa l'Alesanderiya leko, wakatatshokaka utsha l'Italiya, ku ndi akatotshiya loko. 7 Shu takatshu osoku nshi efula, takakumi lasuki la Kinido, taketi l'okongo a Kerete, lasuki la Salamona, ne dia lopepe lakatuhekuya. 8 Lama mbeta leko, aki dikambu dia wulu. Shu takakumi lu dihuli dietawo vati: Abungu w'Amena, lasuki l'usumba wa Lasea.

Lokendo lu Watu Lambuyala Wulu

9 Lam'aketi nshi efula, lokendo lakayala wulu, ne dia nshi y'ekilelu ka mbu ya nde yaketi, Paulu akawaewula. 10 Ndi akawatela ati: Wayone, lambeya nti: Elanyelu ka watu

ETSHA WA ATUMAMI

la eshishwelu ka diango efula ayuyala lu lokendo lone. Keli aha dikambu dia watu la diango tu, keli ndu dia nyumu yasu. 11 Keli olombodi w'alimbi aketawo aui w'usi yenda la wa kanga watu, uleki aui wa Paulu. 12 Ne dia dibungu so tadiaki ololo dia antu ntshikala leko lu ngondo ya tshitshi, ku wane wakaleki efula wakati vati: Tumo lindu, kana tayeya nkuma la Finiki la ntshidiya ngondo ya tshitshi. Leko keli dibungu dimotshi dia la Kerete, dieledi l'asa ngel'a kushi la ehutwelu, ndu l'asa diku dia kushi la ehutwelu ka unya.

13 Lam'akapepe lopepe uma ladiku dia kushi okoke okoke, vo wakakani vati: Tambukundja kalangasu. Vo wakunyia lungu, waketi lasuki la Kerete. 14 Lam'aketi etenyi ka tshitshe, lopepe la wulu lakawetaka vati: "Asa ngel'a kushi l'ehutwelu" lakayi uma la kete. 15 Lam'akalapepe uya lu watu, ku watu kumbeya nsimbo utsha lene akayakaka lopepe. Shu takalembohala, ku lopepe lakatokendjakendja. 16 Taketi l'okongo a kete ya tshitshe, yakawetaka vati: Kauda, taki la dikambu dia wulu dia memba watu a tshitshe. 17 Lam'akawawunya, vo wakatshunge watu a wuki ekodi l'okongo dia mbumamanya. Lam'akawuki woma vati: Lopepe layutukuma ndu la Suriti, vo wakahanula apema, ku lopepe lakatokendjakendja. 18 Lopepe lakatohenyakenya wulu. La wedi a pindju, wakatatela ntambiya diango diaki lu watu lu ashi. 19 Lam'akakuki lushi la satu, vo wakatambiya diango dia nkendjakendja watu lu ashi l'anya awo. 20 Unya la toto kuntohetela nshi efula: lopepe lakaleki wulu; shu kunungamela ntu shati: Tayuhanda. 21 Lam'akawakili ma etenyi k'utali, Paulu akemala l'atei awo, akati ati: Wayone, utunyuka diui diami, tshiki nyu kumunela uma la Kerete, ndu tshiki nyu kundjala la elanyelu ndu la eshishelu ka diango okone. 22 Keli kakiane, nyongenengene. Lumu l'untu hashisho, paka watu utu. 23 Ne dia l'utshu one, ondjelo wa Unyashungu, one lemi untu andi ndu lakambelami ulimu akayemala lasuki la mi; 24 akamvutela ati: Paulu, tukaki woma; dieli la ye dia memala la ntundu ka Kayisa. Enda, Unyashungu ambukusha tshe watatshu la ye lu watu. 25 Okone, nyu wayone, nyongenengene! Dimi la mbetawo le Unyashungu nti: Dikambu diakandamvutedi, diayutshama. 26 Keli dieli la su dia nkuma lu kete ya tshitshe motshi.

Watu Ambuhandjo, Wambuhanda

27 Lam'akakuki utshu a dikumi l'ancei, lopepe lakatutadiatadia l'ashi a wuki w'Adariya. L'asa ndeki, asi watu wakakani vati: Taya l'umamu a kete motshi. 28 Vo wakedika dingunda di'ashi, diaki aboko akumi ahendi. Lam'akawatshu etenyi, vo wakedika ntu, aki aboko dikumi la atanu. 29 Lam'akawuki woma vati: Tayukuma l'ave, vo wakatambiya kungu nyei l'ashi uma l'okongo a watu, vo wakalombe dia unya mputo. 30 Asi watu wakayangi ndawo, wakahuluya watu a tshitshe l'ashi. Wakadimbiya vati: Shu nangaka mbidja kungu kina l'ote a watu. 31 Ku Paulu akatela olombodi w'alimbi ndu alimbi ati: Naka antu aku hawutshikala lu watu, ku hanyeyi nshimbamela. 32 Ku alimbi wakahimbula ekodi wa watu a tshitshe, ku vo wakako l'ashi.

33 Lam'akayangi unya mputo, Paulu akasengasenga vo tshe ati: Nyose ema ka nde, nyuli, ne dia elo eli nshi dikumi la nyei yambunyukila mbu ya nde, nyatali engo. 34 Okone dimi lambunyosengasenga dia nyu nde ema. Dikambu ne dieko dia nyushimbela. Nduku wondji a divu w'untu wayushisho. 35 Lam'akandati osoku, ndi akose ukama a ma, akuki Unyashungu lusaka lu ashu awo tshe, akawatula, akatatela nde. 36 Ku vo tshe wakangenangena, wakali. 37 (Shu tshe lu watu taki kama hyendi la akumi esambeli la asalalu.) 38 Lam'akawaluti, vo wakatambiya epunga lu ashi, ne dia minya wutshu lu watu.

39 Lam'akahuto unya, vo kumbeya kete yako. Keli vo wakenyi okedi waki la umamu a bamubamu, ku wakasanganya diui vati: Tayeya ntola watu utsha leko. 40 Vo wakahimbula ekodi wa kungu, waketsiki lu ashi, wakakeleku ekodi wa tenda wakakelekami. Vo wakahane dipema dia l'ote a watu, wakatshu utsha l'umamu. 41 Vo wakayi lu dihuli diakasangana kushi hyendi, ku watu akakama lu lokongo. Ote a watu wakakama lu lokongo, akashikikala, keli kuma kawo akatatela mpandjo, ne dia asukhu a wulu. 42 Tukanyi t'alimbi taki vati: Tudiaki asi lukanu, watukutsho usali, ku walawo. 43 Keli olombodi w'alimbi akalangi nshimbela Paulu, akashimbi diaha vo ntsha uku akawasanguya. Ndi akati ati: Wane weya ntsho usali, watambeli lu ashi, wakumi l'usui. 44 Akina wose abaya, kana diango dikina uma lu watu. Okone vo tshe wakahandi, wakakumi l'usui la wulu.

Lu Kete ya Malata

28 Lam'akatahandi, shu takeyi shati: Disenga ne mbetawo vati: Malata. 2 Asendji wa leko wakatuki ngandji efula. Vo wakatohetshiya dja, wakatulungula shu tshe, ne dia mvula akatatela ndo ndu akayala tshitshi. 3 Keli lam'akasanganya Paulu ekanda ka kunyi ka munga lu dja, ului akatumbi uma loko ne dia luhaladi la dja, akulumata lu lunya. 4 Lam'akenyi asendji ului a kolo alendalenda lu lunya landi, vo wakatanela vati: Mete, untu one undjakanyi mbendi. Ndi ambuhanda ashi a wuki, keli sambu k'ololo hetawo dia ndi ntshikala la lumu. 5 Keli vo wakalungamela vati: Ndi ayuda, kana ayoko la kete shashimuya, ayuvo. 6 Keli lam'akawalungamela edja, komena nduku dikambu diakayala le ndi, vo wakakadimula tukanyi; wakati vati: Unyashungu mbendi.

Pubiliyo Ambuhangia Paulu

7 Lasuki la lam'akiwo, kaki kete y'untu a wuki a lu kete sho, lukumbu landi Pubiliyo; ndi akatulungula, akatuhangia nshi shatu la kenemo. 8 Shi Pubiliyo aketama la hemo ka dungu la sawu ka dikila. Paulu akoto lene akindi, akalombe, akawahe anya, akokonya. 9 Lam'akandatshi osoku, akina waki la hemo lu kete sho, wakayi, wakakono. 10 Vo wakaleki ntolemia; lam'akatatshu, vo wakotshiya diango diakatahumbi lu watu.

*Wambutsho la Watu Ukina;
Wambukuma la Romo*

11 Lam'aketi ngondo shatu, shu takoto lu watu wa la Alesanderiya waketema lu kete sho lu ngondo ya tshitshi, djimbitelu yawo yaki Ana wa Diasa. 12 Shu takakumi la Sirakuse, takatshikala leko nshi shatu. 13 Takatshimbi uma leko, takakumi la Rengiyo. Lam'aketi lushi otoi, lopepe l'uma ladiku dia kushi lakapepe. Lu lushi la hendi, takakumi la Puteoli. 14 Shu takatani anyasu leko. Vo wakatosenegasenga dia shu ntshikala la wo nshi esambeli. Okone shu takakumi la Romo. 15 Lam'akuki anyasu wa la Romo lukumu lasu, vo wakayi la ndjutusangela lu Kituka k'Apiyo la lu Pangu Shatu. Lam'akawaenyi Paulu, ndi akuki Unyashungu lusaka, akakikitala. 16 Lam'akawakumi la Romo, waketawo dia Paulu mbidjase ndame, ndi la dimbi diakulamaka.

Paulu Ambutela Asi Juda a Waki Diui

17 Lam'aketi nshi shatu, Paulu aketi dihangamendi di'asi Juda. Lam'akawayi, ndi akawatela ati: Anyasu, kuyanga dimi kuntshela antu kolo, kundjaka ditshele dia watshe, keli lakakimwama l'anya w'asi Romo, lakayala usi lukanu umaka Jerusalema. 18 Lam'akawamumbula, vo wakalangi ntshungulami, ne dia dimi taki la dikambu dia mvu. 19 Keli lam'akatuni asi Juda dikambu so, diaki la mi dia nkungela elumbwelu ka Kayisa, keli dimi taki la dikambu dia nsongwela wudja asu. 20 Dia dikambu ne mbakamanyetshi, dia dimi nyena ndu dia nteketa la nyu; dimi lambukelekama la molola one, ne dia elungamelu ka Isariyele. 21 Vo wakawutela vati: Shu kunungula mikanda uma la Judiya dia dikambu diaye. Nduku unyasu akayi lindu dia nkudimula kana nteketa diui dia kolo lu dikambu diaye. 22 Keli shu nangaka mbuka uku akanaye dia otemwelo one. Shu mbeyaka shati: Lu ahuli tshe, antu mvutaka aui wa kolo lu dikambu diawo.

23 Lam'akawosonwela lushi, efula wakayi lakandi. Ndi akalimbitshiya dikambu umaka pindju edja ndu la dikolo; akawatela dia diulelu dia Unyashungu; akawaenya dikambu dia Jesu, uma l'elembe a Mose ndu uma l'au w'amvutshi. 24 Amotshi waketawo akambu wakandati, amotshi wakatuni. 25 Vo kombedimia aui kame, wakamo lam'akawatela Paulu diui diame ati: Nyuma k'Ekila akatela watshenyu dikambu dia mete l'unyo w'umvutshi Isaya ati: 26 Tshoka le antu ane, uwateli wati: Mbuka nyayuka, ku hanyushihudia; Mena nyayena, ku hanyenyi: 27 Etema w'antu ane wambuyala wetshu, Atui awo wambuyala puki, Vo wambudiha ashu awo, Ne dia vo watukena la ashu awo, Watukuka l'atui awo, Watukushihudia l'etema awo, Watukukadimo, dia dimi mbakonoya. 28 Okone nyeyi nyati: Panda kene ka Unyashungu kambutumama le asi wedja ndu vo wayukiuka. 29 Lam'akandati aui aso, asi Juda wakamo, wakadjana tamu efula.

Paulu Ambusambisha la Romo Deku Pendi

30 Paulu akadjase deku pendu etundu lu luudu lone lakandafutaka, akalungula antu tshe wakayakaka le ndi. 31 Ndi akasambisha dia diulelu dia Unyashungu; akawaetshaka akambu wa Khumadiondjo Jesu Kristu la dihunga tshe. Nduku untu akushimbi.